



THEOT Daniel in Gunda Gunde (GG) 106

Ff. 164r–172r

For the books of the Daniel cycle, the following people were involved in creating first, second, and third drafts of transcriptions: Hiwot Samuel, Ashlee Maslik, Jonah Sanford, Steve Delamarter, Qidist, Dejene, and Sarah Vulcan. Draft 4,

Transkribus; Draft 5, Steve Delamarter; Draft 6: Demeke Berhane; Draft 7: Delamarter and Berhane.

Nota Bene: Each paragraph represents the text from a single column. The images can be viewed from the University of Toronto at <https://ark.digital.utoronto.ca/ark:61220/utsc35494>; or at vHMML at <https://w3id.org/vhmml/readingRoom/view/789588>

f. 164r

(col. 1) ወሀሎ፡ ፩ብእሲ፡ ዘይነብር፡ በባቢሎን፡ ዘስሙ፡ ኢዮአቄም፡ ወአውሰበ፡ ብእሲተ፡ አንተ፡ ስማ፡ ሶስና፡ ወለተ፡ ኬልቅዩ፡ ወሠናይት፡ ይእቲ፡ ጥቀ፡ ወትፈርሁ፡ እግዚአብሔርሃ፡ ወአዝማዲሃ፡ ጸድቃን፡ እሙንቱ። ወመሀርዋ፡ ለወለቶሙ፡ አሪተ፡ ሙሴ። ወኢዮአቄምሰ፡ ምታ፡ ውእቱ፡ ባዕል፡ ጥቀ፡ ወቦ፡ ዓጸደ፡ ሐምል፡ ጎረ፡ ቤቱ፡ ወይመጽኡ፡ ጎቤሁ፡ አይሁድ፡ እስመ፡ ውእቱ፡ ይከብር፡ እምኲሎሙ። ወአስተርአዩ፡ ፪ረባናት፡ እምሕዝብ፡ መደልዋን፡ በውእቱ፡ ዓመት፡ እለ፡ በእንቲአሆሙ፡ ነገረ፡ እግዚአብሔር፡ ከመ፡ እምባቢሎን፡ ወፅአት፡ ኃጢአት፡ እምረባናት፡ መደልዋን፡ እለ፡ ይብሉ፡ ነዓቅቦሙ፡ ለሕዝብ። ወእሙንቱሰ፡ ይጸመዱ፡ ቤተ፡ ኢዮአቄም፡ ወይመጽኡ፡ ጎቤሁ፡ ኲሎሙ፡ እለ፡ ይትኳነኑ። ወእምዝ፡ አቲዎሙ፡ ሕዝብ፡ ጊዜ፡ ቀትር፡ ተበውዕ፡ ሶስና፡ ወታንሰሱ፡ ውስተ፡ ዓፀደ፡ አቅማ፡ ዘምታ፡ ወይሬእይዋ፡ ረባናት፡ ኲሎ፡ አሚረ፡ ሶብ፡ ትበውዕ፡ ወታንሰሱ፡ ወፈተውዋ፡ ወሜጡ፡ ልቦሙ። ወገፍትዑ፡ አዕይንቲሆሙ፡ ከመ፡ ኢይነጽሩ፡ ሰማየ፡ ወኢተዘከሩ፡ ኲነኔ፡ ጽድቅ፡ ወክልዔሆሙ፡ አፍቀርዋ፡ ወኢተናገሩ፡ በበይናቲሆሙ፡ ዘውስተ፡ ልቦሙ፡ እስመ፡ ኃፍሩ፡ ነገረ፡ ጌጋዮሙ፡ ወይፈቅዱ፡ ይስሰቡ፡ ምስሌሃ፡ ወይጸንሕዋ፡ ኲሎ፡ አሚረ፡ ይርከብዋ። ወይቤ፡ ፩ለካልኡ፡ ተንሥእ፡ ንዕቱ፡ ቤተነ፡ እስመ፡ ጊዜ፡ ምሳሕ፡ ውእቱ፡ ወኃለፉ፡ ወተፋለጡ፡ በበይናቲሆሙ፡ ወተሠውጡ፡ ወተራከቡ፡ ጎቡረ፡ ወተናጸሩ፡ ፪ሆሙ፡ ወሶሌሃ፡ ተናገሩ፡ ፍትወቶሙ፡ ወተዓደሙ፡ ጊዜ፡ ይክሉ፡ ረኪቦታ፡ በባሕቲታ፡ ወእምዝ፡ እንዘ፡ ይጸንሕዋ፡ መዓልተ፡ ቦአት፡ ሶሌሃ፡ ሶስና፡ ከመ፡ ዘ

(col. 2) ልፍ፡ ምስለ፡ ፪አዋልዲሃ፡ ወፈተውት፡ ትትሐፀብ፡ በውስተ፡ ገነት፡ እስመ፡ ሐፈውት፡ ወአልቦ፡ ህዩ፡ ወኢመኑሂ፡ ዘእንበለ፡ ፪ረባናት፡ እንዘ፡ ይጸንሕዋ፡ ወይትኃብኡ፡ ወትቤሎን፡ ለአዋልዲሃ፡ ያምጽኡ፡ ላቲ፡ ቅብዓ፡ ወይዕፅዋ፡ ጥጎተ፡ ገነት፡ ወትትሐፀብ። ወገብራ፡ በከመ፡ አዘዘቶን፡ ወአፀዋ፡ ጥጎተ፡ ገነት፡ ወወፅአ፡ እንተ፡ መፍልሰት፡ ከመ፡ ያምጽኡ፡ ዘአዘዘቶን፡ ወኢርእያሆሙ፡ ለረባናት፡ እለ፡ ይትኃብእዎን። ወወጺአን፡ እልክቱ፡ አዋልዲሃ፡ ተንሥኡ፡ እልክቱ፡ ረባናት፡ ወሮጹ፡ ጎቤሃ፡ ወይቤልዋ፡ ናሁ፡ ዕፅው፡ ጥጎተ፡ ገነት፡ ወአልቦ፡ ዘይሬእየነ፡ ንፈቱ፡ ንስክብ፡ ምስሌኪ፡ ኦሆ፡ በልነ፡ ወእመ፡ አኮሰ፡ ናስተዋድየኪ፡ ከመ፡ ረከብነ፡ ብእሴ፡ ምስሌኪ፡ ወበእንተዝ፡ ሰደድኪ፡ አዋልደኪ፡ እምጎቤኪ። ወበከየት፡ ሶስና፡ ወትቤ፡ ተመንደብኩ፡ እምኲላሄ፡ እመሂ፡ ገበርኩ፡ እመውት፡ ወእመሂ፡ ኢገበርኩ፡ ኢይድጎን፡ ወኢይክል፡ አምሥጦ፡ እምእዴሆሙ። ይኔይስኒ፡ ኢገቢርየ፡ እደቅ፡ ውስተ፡ እዴሆሙ፡ እምአዓብስ፡ ቅድመ፡ እግዚአብሔር። ወአውየውት፡ ሶስና፡ በዓቢይ፡ ቃል፡ ወአውየው፡ ረባናት፡ ምስሌሃ። ወሮጹ፡ ፩ወአርኃው፡ ጥጎተ፡ ገነት፡ ወሰሚሆሙ፡ አውያታ፡ በውስተ፡ ገነት፡ እለ፡ ውስተ፡ ቤታ፡ ወወፅኡ፡ በጊዜሃ፡ ወሮጹ፡

እንተ፡ መፍልስት፡ ይርአዩ፡ ዘኮነ፡ ወኮነ፡ ሶባ፡ ተናገሩ፡ እልክቱ፡ ረባናት፡ ዘንተ፡ ነገረ፡ ተጋፍሩ፡ አግብርቲ፡ ጥቀ፡ ወአገማዲ፡ እስመ፡ ግሙራ፡ ኢተሰምዓ፡ ዘከመዝ፡ ነገር፡ ላዕለ፡ ሶስና፡ ወበሳኒታ፡ ተጋቢአሙ፡ ሕዝብ፡ ኅበ፡ ምታ፡ ኢዮአቄም፡ ወመጽኡ፡ እልክቱ፡ ረባናት፡ ፪ምስለ፡ ልቦሙ፡ ዘዓመዓ፡ ከመ፡ ይቅትልዋ፡ ለሶስና፡ ወይቤሎ፡ በቅድመ፡ ሕዝብ፡ ወለዓኩ፡

(col. 3) ኅበ፡ ሶስና፡ ወለተ፡ ኬልቅዩ፡ እንተ፡ ይእቲ፡ ብእሲተ፡ ኢዮአቄም፡ ከመ፡ ትምጻእ፡ ወውእተ፡ ጊዜ፡ ፈነው፡ ባቲ፡ ወመጽኡት፡ ሶስና፡ ምስለ፡ አበዊሃ፡ ወደቂቃ፡ ወኹሉ፡ ነገዳ፡ ወሶስናስ፡ ላህይት፡ ጥቀ፡ ወሠናይት፡ በራእያ፡ ወአዘዘ፡ እልክቱ፡ ዓማፅያን፡ ይክሥትዋ፡ ርእሳ፡ ከመ፡ ይጽገቡ፡ እምላህያ፡ ወከሠትዋ፡ ወበከዩ፡ አገማዲ፡ ወሰብአ፡ ወኹሉ፡ ዘየአምራ፡ ወተንሥኡ፡ እልክቱ፡ ፪ረባናት፡ ማዕከለ፡ ሕዝብ፡ ወአንበሩ፡ እደዊሆሙ፡ ላዕለ፡ ርእሳ፡ ወይእቲሰ፡ እንዘ፡ ትበኪ፡ ነጻረት፡ ሰማየ፡ እስመ፡ ተወከለ፡ ልባ፡ በእግዚአብሔር፡ ወይቤሎ፡ እልክቱ፡ ፪ረባናት፡ እንዘ፡ ናንሶሱ፡ ውስተ፡ ገነት፡ ባሕቲተነ፡ ወቦአት፡ ይእቲ፡ ብእሲት፡ ወ፪ገዛኢሃ፡ ወእላንተ፡ ሱዓፀዋ፡ ጥኅተ፡ ገነት፡ ወወፅአ፡ ወሐራ፡ እስመ፡ ፈነወቶን፡ ለአዋልዲሃ፡ ወመጽኡ፡ ኅቤሃ፡ ወሬዛ፡ እምእደ፡ ይትጋባዕ፡ ወሰከበ፡ ምስሌሃ፡ ንሕነሰ፡ ውስተ፡ መዓዝንተ፡ ገነት፡ ርኢነ፡ ኃጢአቶሙ፡ ሮፅነ፡ ኅቤሆሙ፡ ወረከብናሆሙ፡ እንዘ፡ ይሰክቡ፡ ኅቡረ፡ ወንሕነሰ፡ ሎቱ፡ ስዕናሁ፡ እኒዞቶ፡ ወአምሰጠነ፡ እስመ፡ ይኒይሰነ፡ ወአርጋወ፡ ጥኅተ፡ ገነት፡ ወወፅአ፡ ወኪያሃሰ፡ አኅዝናሃ፡ ወተስእልናሃ፡ ወመኑ፡ ውእቱ፡ ብእሲሁ፡ ወኢያይድዓተነ፡ ወአምንዎሙ፡ ዓውድ፡ እስመ፡ ረባናት፡ ሕዝብ፡ እሙንቱ፡ ወመኳንንት፡ ወኩነንዋ፡ ትሙት፡ ወአውየወት፡ ሶስና፡ በዓቢይ፡ ቃል፡ ወትቤ፡ አአምላክ፡ ዘለዓለም፡ ዘተአምር፡ ኅቡአ፡ ወዘተአምር፡ ኹሎ፡ ዘእንበለ፡ ይኩን፡ አንተ፡ ተአምር፡ ከመ፡ ሐሰተ፡ አስተዋደደኒ፡ እሉ፡ ረባናት፡ ወናሁ፡ እመውት፡ እንዘ፡ አልቦ፡ ዘገበርኩ፡ በዘአኅሠሙ፡ ላዕሌየ፡ እሉ፡ ረባናት፡ ወሰምዓ፡ እግዚአብሔር፡ ቃለ፡ ወእንዘ፡ ይወሰድዋ፡ ይቅትልዋ፡ አንሥኦ፡ እግዚአብሔር

F. 164v

(col. 1) ር፡ መንፈሶ፡ ቅዱስ፡ ላዕለ፡ ወልድ፡ ወሬዛ፡ ዘስሙ፡ ዳንኤል፡ ወከልሐ፡ በዓቢይ፡ ቃል፡ ወይቤ፡ ንጹሕ፡ አነ፡ እምደማለዛቲ፡ ወለት፡ ወተመይጡ፡ ኹሉ፡ ሕዝብ፡ ኅቤሁ፡ ወይቤሎ፡ ምንትኑ፡ ዝንቱ፡ ነገር፡ ዘትብል፡ አንተ፡ ወቆመ፡ ማዕከሎሙ፡ ወይቤሎሙ፡ ከመዝኑ፡ አብዳን፡ አንትሙ፡ ደቂቀ፡ እስራኤል፡ ዘአንበለ፡ ትሕትቱ፡ ወትጠይቁ፡ ትኳንኑ፡ ወለተ፡ እስራኤል፡ ግብኡኪ፡ ውስተ፡ ዓውድ፡ እስመ፡ ሐሰው፡ አስተዋድዮታ፡ እሉ፡ ረባናት፡ ወተሠውጡ፡ ኹሉ፡ ሕዝብ፡ እንዘ፡ ይረውጹ፡ ውስተ፡ ዓውድ፡ ወይቤልዎ፡ ሊቃናት፡ ለዳንኤል፡ ነዓ፡ ንበር፡ ማዕከሌነ፡ ወንግረነ፡ እስመ፡ ኪያክ፡ አልሐቀ፡ እግዚአብሔር፡ ወይቤሎሙ፡ ዳንኤል፡ አርኅቅዎሙ፡ ዘዘዘአሆሙ፡ ወእኅትቶሙ፡ ወዓቀምዎሙ፡ በበ፩ወጸዎ፡ ለ፩እምኔሆሙ፡ ወይቤሎ፡ ብሉይ፡ መዋዕሊክ፡ እኩያት፡ ወበጽሐ፡ ኃጣውኢክ፡ ዘገበርክ፡ ቀዲሙ፡ እስመ፡ ኩነንክ፡ ፍትሐ፡ ዓመዓ፡ ወአሕዮክ፡ ጊጉያነ፡ ወቀተልክ፡ ንጹሐነ፡ ዘከልኦ፡ እግዚአብሔር፡ ወይቤ፡ ጻድቀ፡ ወንጹሐ፡ ኢትቅትል፡ ወይእዜኒ፡ እመ፡ ርኢክ፡ ንግረኒ፡ ለዛቲ፡ ብእሲት፡ በታሕተ፡ ዓይ፡ ዕፅ፡ ኅበ፡ ርኢክሙ፡ ይትናገሩ፡ ፪ሆሙ፡ ወይቤ፡ ታሕተ፡ ዕፅ፡ ሰኪኖን፡ ወይቤሎ፡ ዳንኤል፡ አማን፡ ሐሰውክ፡ ወደመ፡ ስም፡ ላዕለ፡ ርእሰክ፡ ናሁ፡ ወድኦ፡ መልክ፡ እግዚአብሔር፡ ዘተአዘዘ፡ እምኅበ፡ እግዚአብሔር፡ ያንቅዕክ፡ እማዕከልክ፡ ወአግኃሥ፡ ኪያሁ፡ ወአዘዘ፡ ያምጽኡ፡ ካልኦ፡ ወይቤለ፡ ዘርኦ፡ ከነኦን፡ አንተ፡ ወአኩ፡ ዘይሁዳ፡ ላህይኑ፡ አስሐተክ፡ ወፍትወት፡ እኪት፡ ገፍትዓት፡ ልበክ፡ ለምንት፡ ከመዝኑ፡ ትራሰዩ፡ ሰምየ፡ ለወለተ፡ እስራኤል፡ እስመ፡ ይእቲ፡ ኢክህለት፡ ተዋቅሥተክሙ፡ ወፈርሃት፡ ወለተ፡ ይሁዳ፡ ወተዓገሠ

(col. 2) ት፡ ዓመዓክሙ፡ ንግረኒ፡ ወይእዜኒ፡ ዕፁ፡ ምንትኑ፡ በኅበ፡ ረከብካሆሙ፡ ወእንዘ፡ ይትናገሩ፡ ፪ሆሙ፡ ወይቤ፡ ታሕተ፡ ዕፅ፡ ጽርዮን፡ ወይቤ፡ ዳንኤል፡ አማን፡ ሐሰውክ፡ አንተሂ፡ ላዕለ፡ ርእሰክ፡ ናሁ፡ ጽኑሕ፡ መልክ፡ እግዚአብሔር፡ በሰይፍ፡ ዘይሰፈርክ፡ ለመንፈቅክ፡ ከመ፡ ይሠርውክሙ፡ ለክልኤክሙ፡

ወክልሑ፡ ኩሉ፡ ሕዝብ፡ በዓቢይ፡ ቃል፡ ወባረክዎ፡ ለእግዚአብሔር፡ ዘኣድኃና፡ ለሶስና፡ ዘተወከለት፡
 ወእለ፡ ተወከሉ፡ ቦቱ፡ ወተንሥኡ፡ ላዕለ፡ እልክቱ፡ ፪፡ ረበናት፡ እስመ፡ ኦርስሐሙ፡ ዳንኤል፡
 አምቃሎሙ፤ ወሐሰው፡ ስምዎሙ፡ ወገብሩ፡ ላዕሌሆሙ፡ እኩየ፡ በከመ፡ ገብሩ፡ እኩየ፡ ዲበ፡ ቢጾሙ፡
 በሕገ፡ ሙሴ፡ ወቀተልዎሙ፤ ወኣድኃነ፡ ደመ፡ ንጹሐ፡ እምእዴሆሙ፡ በይእቲ፡ ዕለት፡ ወአእኩትዎ፡
 ለእግዚአብሔር፡ ኬልቅዩ፡ ወበእሲቱ፡ በአንተ፡ ወለቶሙ፡ ሶስና፡ ምስለ፡ ኢዮአቄምምታ፡ ወኩሎሙ፡
 አዝማዲሃ፡ እስመ፡ ኢተረከበ፡ እኩየ፡ ምግባር፡ ላዕሌሃ፡ ወኮነ፡ ዳንኤል፡ ዓቢየ፡ በቅድመ፡ ሕዝብ፡
 እምይእቲ፡ ዕለት፡ ወለዝሉ፥፥ ራእይ፡ ፩ራእይ፡ ፪፡ አመ፡ ሠላስ፡ ዓመተ፡ መንግሥቱ፡ ለኢዮአቄም፡
 ንጉሠ፡ ይሁዳ፡ መጽአ፡ ናቡከደነጾር፡ ንጉሠ፡ ባቢሎን፡ ኢየሩሳሌም፡ ወተቃተላ፡ ወአግብኦ፡ እግዚአብሔር፡
 ውስተ፡ እዴሁ፡ ለኢዮአቄም፡ ንጉሠ፡ ይሁዳ፤ ወንዋየ፡ ቤተ፡ እግዚአብሔር፡ ነሥኦ፡ ወወሰደ፡ ብሔረ፡
 ሰናኦር፡ ቤተ፡ አምላኩ፡ ወንዋየተ፡ አቡሁ፡ ወሰደ፡ ወቤተ፡ መዝገበ፡ አምላኩ፡ ወይቤሎ፡ ንጉሥ፡
 ለአዝፋኒስ፡ ሊቀ፡ ሕፅዋኒሁ፡ ከመ፡ ያምጽእ፡ እምደቂቀ፡ እስራኤል፡ እምእለ፡ ተዓወወ፡ እምዘርኦ፡
 መንግሥት፡ ቢጸ፡ ወራዙተ፡ እለ፡ አልቦሙ፡ ነውር፡ ዘላህይ፡ ገጾሙ፡ ወዘየአምሩ፡ ኩሎ፡ ጥበበ፡
 ወይሌብው፡

(col. 3) ምክረ፡ ወይሔልዩ፡ ጥዩቀ፡ እለ፡ ቦመ፡ ኃይል፡ ይቁሙ፡ ውስተ፡ ጽርኃ፡ ንጉሥ፡
 ወይምሐርዎሙ፡ መጽሐፈ፡ ወነገረ፡ ፋርስ፡ ወአዘዘ፡ ንጉሥ፡ ሲሳዮሙ፡ ኩሎ፡ አሚረ፡ የሀብዎሙ፡
 እማዕደ፡ ንጉሥ፡ ዘዘዕለቶሙ፤ ወእምነ፡ ወይን፡ ዘይሰቲ፡ ንጉሥ፡ ወይኅርስዎሙ፡ እስከ፡ ፫ዓመት፡ ወእምዝ፡
 ይቁሙ፡ ቅድመ፡ ንጉሥ፤ ወሀለዉ፡ ውስቴቶሙ፡ እምደቂቀ፡ ይሁዳ፡ ዳንኤል፡ ወአናንያ፡ ወአዛርያ፡
 ወሚሳኤል፤ ወወለጠ፡ ሎሙ፡ አስማቲሆሙ፡ ሊቀ፡ ሕፅዋን፡ ለዳንኤል፡ ስመዮ፡ ብልጣሶር፡ ወለአናንያ፡
 ሲድራቅ፡ ወለአዛርያ፡ ሚሳቅ፡ ወለሚሳኤል፡ አብድናጎ፤ ወአጥብዓ፡ ዳንኤል፡ በልቡ፡ ከመ፡ ኢይብላዕ፡
 አማዕደ፡ ንጉሥ፡ ወከመ፡ ኢይስተይ፡ እምወይኦ፤ ወአስተብቅዖ፡ ለሊቀ፡ ሕፅዋን፡ ከመ፡ ኢያብልዖ፡
 ወወሀቦ፡ እግዚአብሔር፡ ሣህለ፡ ወምሕረተ፡ በቅድመ፡ ሊቀ፡ ሕፅዋን፡ ወይቤሎ፡ ሊቀ፡ ሕፅዋን፡ ለዳንኤል፡
 እፈርሆ፡ ለእግዚአብሔር፡ ንጉሥ፡ እስመ፡ አዘዘ፡ ሲሳየክሙ፡ ዘትበልዑ፡ ወዘትሰትዩ፡ እመ፡ ርእየክሙ፡
 ድግዱጋኒክሙ፡ እምደቅ፡ እለ፡ ቢጽክሙ፡ ኢይኩንነኒ፡ ንጉሥ፡ ርእስየ፤ ወይቤሎ፡ ዳንኤል፡ ለአሚሳድ፡
 ዘሣሌም፡ ሊቀ፡ ሕፅዋን፡ ዲበ፡ አናንያ፡ ወአዛርያ፡ ወሚሳኤል፡ አመክሮሙ፡ ለአግብርቲክ፡ ዓሡረ፡ ዕለተ፡
 ሀበነ፡ እምዘርኦ፡ ምድር፡ ወንብላዕ፡ ወማየ፡ ንስተይ፡ ወትርአይ፡ ነፍስተነ፡ ወነፍስቶሙ፡ ለደቅ፡ እለ፡
 ይሴሰዩ፡ እማዕደ፡ ንጉሥ፤ ወዘከመ፡ ርኢከ፡ ግበር፡ ምስለ፡ አግብርቲክ፡ ወሰምዎሙ፡ ዘንተ፡ ነገረ፡
 ወአመክሮሙ፡ አሡረ፡ ዕለተ፤ ወኃሊፎ፡ ዓሡር፡ ዕለት፡ ኅየሰ፡ ነፍስቶሙ፡ ወሠነየ፡ ራእዮሙ፡
 እምእልክቱ፡ ደቅ፡ ዘይሴሰዩ፡ አማዕደ፡ ንጉሥ፡ ወእምዝ፡ ይነሥእ፡ አሚሳድ፡ መብልዎሙ፡ ወወይነ፡
 ዘይሰትዩ፡ ወይሁቦሙ፡ ዘርኦ፡ ምድር፡ ለ፬ደቅ፤ ወወሀቦሙ፡

F. 165r

(col. 1) እግዚአብሔር፡ ጥበበ፡ ወአእምሮ፡ ወልቡና፡ በኩሉ፡ መጽሐፍ፤ ወዳንኤል፡ ኮነ፡ ጠቢብ፡ በኩሉ፡
 ራእይ፡ ወበፍካሬ፡ ህልም፤ ወእምዝ፡ ተፈጺሞ፡ መዋዕል፡ አዘዘ፡ ንጉሥ፡ ያምጽእዎሙ፡ ኅቤሁ፤
 ወአብኦሙ፡ ሊቀ፡ ሕፅዋን፡ ቅድመ፡ ንጉሥ፡ ናቡከደነጾር፡ ወተናገሮሙ፡ ንጉሥ፡ ወኢተረከበ፡ በውስተ፡
 ኩሉ፡ ከመ፡ ዳንኤል፡ ወአናንያ፡ ወአዛርያ፡ ወሚሳኤል፤ ወቆሙ፡ ቅድመ፡ ንጉሥ፡ በኩሉ፡ ነገረ፡ ጥበብ፡
 ወምክር፡ ዘኅሠሠ፡ ንጉሥ፡ ኅቤሆሙ፡ ረከበ፡ ፲እደ፡ እምኩሎሙ፡ ሰብኦ፡ ሥራይ፡ ወኩሉ፡ ሰብኦ፡ ሰገል፡
 እለ፡ ውስተ፡ መንግሥቱ፡ ወነበረ፡ ዳንኤል፡ እስከ፡ አሐቲ፡ ዓመተ፡ መንግሥቱ፡ ለቂሮስ፡ ንጉሥ፤ ራእይ፡
 ፪ራእይ፤ ወበካልእ፡ ዓመተ፡ መንግሥቱ፡ ሐለመ፡ ናቡከደነጾር፡ ሕልመ፡ ወደንገፀት፡ ሙንፈሱ፤ ወረሰዓ፡
 ሕልሞ፡ ወይቤ፡ ንጉሥ፡ ይጸውዑ፡ ሰብኦ፡ ስራይ፡ ወሰብኦ፡ ሰገል፡ ወወቢባነ፡ ወለባውያነ፡ ወማእምራነ፡
 ወከመ፡ ይንግርዎ፡ ለንጉሥ፡ ሕልሞ፡ ወመጽኡ፡ ወቆሙ፡ ቅድመ፡ ንጉሥ፤ ወይቤሎሙ፡ ንጉሥ፡

ሐለምኩ፡ ህልመ፡ ወደንገፀት፡ ነፍስየ፡ ወረሳዕኩ፡ ህልምየ፡ ወተናገርዎ፡ ጠቢባነ፡ ከለዳውያን፡ ለንጉሥ፡ በሱርስት፡ ወይቤልዎ፡ ንጉሥ፡ ለዓለም፡ ሕየው፡ አንተ፡ ንግሮሙ፡ ለአግብርቲክ፡ ህልመክ፡ ወናይድዕክ፡ ፍካሬሁ፡ ወተሠጥዎሙ፡ ንጉሥ፡ ወይቤሎሙ፡ ለጠቢባን፡ ተረሥዓኒ፡ ነገሩ፡ ወእምከመሰ፡ ኢታየድዑኒ፡ ሕልምየ፡ ወኢትፊኤስሩ፡ ሊተ፡ ትመውቱ፡ ወተትበረበሩ፡ ንዋየክሙ፡ ወእምከመሰ፡ አይዳዕክሙኒ፡ ሕልምየ፡ ወፈከርከሙሂ፡ ሊተ፡ ትነሥኡ፡ ፍተክሙ፡ ወአስበክሙ፡ ወብዙኃ፡ አከብረክሙ፡ ወዳዕሙ፡ ንግሩኒ፡ ሕልምየ፡ ወፈክሩ፡ ሊተ፡ ወአውሥእዎ፡ ዳግመ፡ ወይቤልዎ፡ ንጉሥ፡ ይንግሮሙ፡ ለአግብር

(col. 2) ቲሁ፡ ሕልሞ፡ ወፍካሬሁስ፡ ንነግሮ፡ ወተሠጥዎሙ፡ ንጉሥ፡ ወይቤ፡ አማን፡ አእመርኩ፡ አነ፡ ከመ፡ ታስተሐፍሩኒ፡ እስመ፡ ተረሥዓኒ፡ ነገሩ፡ እምከመ፡ ይእዜ፡ ኢትነግሩኒ፡ ሕልምየ፡ አእመርኩ፡ እንከ፡ ከመ፡ ተኃሥወ፤ ሊተ፡ ዘትፈጥሩ፡ ነገረ፡ ሐሰት፡ ቅድሜየ፡ አይድዑኒ፡ ህልምየ፡ ዘእንበለ፡ ይኅልፍ፡ ጊዜሁ፡ ወአአምር፡ ከመ፡ ፍካሬሁ፡ ትንግሩኒ፡ ወአውሥኡ፡ ካዕበ፡ ጠቢባን፡ በቅድመ፡ ንጉሥ፡ ወይቤሎ፡ አልቦ፡ ሰብእ፡ በዲበ፡ ምድር፡ ዘይክል፡ አእምሮ፡ ነገሩ፡ ለንጉሥ፡ ወአልቦ፡ ንጉሥ፡ ዓቢይ፡ ወመልአክ፡ ዘይሴአል፡ ነገረ፡ ዘከመዝ፡ በኀበ፡ ጠቢባን፡ ወሰብአ፡ ሰገል፡ ወሰብአ፡ ሥራይ፡ እስመ፡ ዕፁብ፡ ዝነገር፡ ዘይሴአል፡ ንጉሥ፡ ወአልቦ፡ ባዕድ፡ ዘይነግር፡ ህልሞ፡ ለንጉሥ፡ ዘእንበለ፡ አማልክት፡ እለ፡ ኢኮነ፡ ንብረቶሙ፡ ምስለ፡ ኩሉ፡ ዘሥጋ፡ ወሶቤሃ፡ ተምዓ፡ ንጉሥ፡ ዓቢየ፡ መዓተ፡ ወይቤ፡ ይቅትልዎሙ፡ ለኩሎሙ፡ ጠቢባነ፡ ባቢሎን፡ ወፅአ፡ ትእዛዝ፡ እምኀበ፡ ንጉሥ፡ ወአኀዙ፡ ይቅትልዎሙ፡ ወኃሥዎሙ፡ ለዳንኤል፡ ወአናንያ፡ ወአዛርያ፡ ወሚሳኤል፡ አዕርክቲሁ፡ ይቅትልዎሙ፡ ወተናገሮ፡ ዳንኤል፡ ለአርዮክ፡ ሊቀ፡ መበስለኒሁ፡ ለንጉሥ፡ ዘወፅአ፡ ይቅትሎሙ፡ ለጠቢባነ፡ ባቢሎን፡ ወተስእሎ፡ ወይቤሎ፡ ለአርዮክ፡ መልአክ፡ ንጉሥ፡ በአንተ፡ ምንት፡ ወፅአ፡ ትእዛዝ፡ ዕፁብ፡ እምቅድመ፡ ገጹ፡ ለንጉሥ፡ ወነገሮ፡ አርዮክ፡ ለዳንኤል፡ ወቦአ፡ ዳንኤል፡ ወአስተብቀሥዎ፡ ከመ፡ የዓድሞ፡ እስከ፡ ፫ዕለት፡ ወይንግሮ፡ ለንጉሥ፡ ሕልሞ፡ ወይፈክር፡ ሎቱ፡ ወቦአ፡ ዳንኤል፡ ቤቶ፡ ወነገሮሙ፡ ለአዕርክቲሁ፡ ዘነገረ፡ ለአናንያ፡ ወአዛርያ፡ ወሚሳኤል፡ ወሰአሉ፡ ሣህለ፡ በኀበ፡ አምላክ፡ ሰማይ፡ በእንተ፡ ኩሉ፡ ነገር፡ ዘ

(col. 3) ኀቡዕ፡ ከመ፡ ኢይሙት፡ ዳንኤል፡ ወአእርክቲሁ፡ ምስለ፡ ኩሎሙ፡ ጠቢባነ፡ ባቢሎን፡ ወእምዝ፡ ተከሥተ፡ ሎቱ፡ ለዳንኤል፡ በራእየ፡ ሌሊት፡ ወአእኩቶ፡ ዳንኤል፡ ለአምላክ፡ ሰማይ፡ ወይቤ፡ ይትባረክ፡ ወይትሌዓል፡ ስሙ፡ ለእግዚአብሔር፡ ለዓለም፡ ወእስከ፡ ለዓለም፡ እስመ፡ ሎቱ፡ ውእቱ፡ ጥበብ፡ ወምክር፡ ወኃይል፡ ወውእቱ፡ ይዌልጥ፡ ዓመተ፡ ወመዋዕለ፡ ወያነብር፡ ነገሥተ፡ ወይሥዕር፡ ወይሁቦሙ፡ ጥበበ፡ ለጠቢባን፡ ወምክረ፡ ለመካርያን፡ ወውእቱ፡ ይከሥት፡ ዘዕመቅ፡ ወዘኀቡዕ፡ ወየአምር፡ ኩሉ፡ ዘውስተ፡ ጽልመት፡ ወኀቤሁ፡ ሀሎ፡ ብርሃን፡ አንተ፡ አምላክ፡ አበዊነ፡ እገኒ፡ ለከ፡ ወእሴብሐክ፡ እስመ፡ ወሀብከኒ፡ ጥበበ፡ ወአእምሮ፡ ወነገርከኒ፡ ዘአስተብሐክከ፡ ወአይዳዕከኒ፡ ህልሞ፡ ለንጉሥ፡ ወፍካሬሁኒ፡ ወሐረ፡ ዳንኤል፡ ኀበ፡ አርዮክ፡ ዘአዘዞ፡ ንጉሥ፡ ከመ፡ ይቅትትሎሙ፡ ለጠቢባነ፡ ባቢሎን፡ ወይቤሎ፡ ዳንኤል፡ ኢትቅትሎሙ፡ ለጠቢባነ፡ ባቢሎን፡ አዕርኒ፡ ኀበ፡ ንጉሥ፡ አነ፡ እነግሮ፡ ህልሞ፡ ለንጉሥ፡ ፍካሬሁ፡ ወሕልሞሂ፡ ወሶቤሃ፡ ፍጡነ፡ አብአ፡ ለዳንኤል፡ አርዮክ፡ ቅድመ፡ ንጉሥ፡ ወይቤ፡ ረከብኩ፡ ብእሴ፡ እምደቂቀ፡ ጸዋ፡ ይሁዳ፡ ዘይነግሮ፡ ህልሞ፡ ለንጉሥ፡ ወፍካሬሁ፡ ወተሠጥዎ፡ ንጉሥ፡ ለዳንኤል፡ ዘተሰምየ፡ ብልጣሶር፡ ትክልኑ፡ ትንግረኒ፡ ሕልምየ፡ ወፍካሬሁኒ፡ ዘርኢኩ፡ ወአውሥኡ፡ ዳንኤል፡ ቅድመ፡ ንጉሥ፡ ወይቤ፡ ዝነገር፡ ዘይሴዓል፡ ንጉሥ፡ ኢኮነ፡ ለጠቢባን፡ ወኢለ፡ ማዕምራን፡ ወኢለሰብአ፡ ሰገል፡ ወኢለእለ፡ ሥራይ፡ ከመ፡ ይክሐሉ፡ ይንግሮዎ፡ ለንጉሥ፡ ሀሎ፡ ዳዕሙ፡ አምላክ፡ ውስተ፡ ሰማይ፡ ዘይከሥት፡ ዘኀቡዕ፡ ወውእቱ፡ አርአዮ፡ ለናቡከ

F. 165v

(col. 1) ከደነጽር፡ ንጉሥ፡ ዘሀሎ፡ ይኩን፡ በደኃሪ፡ መዋዕል፡ ከመዝ፡ ውእቱ፡ ህልምክ፡ ወራእየ፡ ዘርኢክ፡ በርእስክ፡ በውስተ፡ ምስካቢክ፡ ንጉሥ፡ እስመ፡ ሐለይክ፡ ምንተ፡ ይከውን፡ እምድኅሬክ፡ ወዘይከሥት፡

ኅቡአ፡ አርአየከ፡ ዘሀሎ፡ ይኩን። ወአነሂ፡ አኮ፡ በጥበብየ፡ እምኩሉ፡ ዕጓለ፡ እመሕያው፡ ዘተከሥተ፡ ሊተ፡
 ዘኅቡዕ። ዳዕሙ፡ ከመ፡ እንግሮ፡ ለንጉሥ፡ ፍካሬሁ፡ ከመ፡ ታእምር፡ ዘሐለይከ፡ በልብከ፡ አንተ፡ ንጉሥ፡
 ርኢከ። ወናሁ፡ ምስል፡ ፩ዓቢይ፡ ወውእቱ፡ ምስል፡ ገጹ፡ ይኔጽር፡ ቅድሜከ፡ ወግሩም፡ ራዕዩ፡ ለውእቱ፡
 ምስል፡ ርእሱ፡ ዘወርቅ፡ ጽሩይ። እደዊሁ፡ ወእንግድዓሁ፡ ወመዝራዕቱ፡ ዘብሩር። ከርሡ፡ ወሐቋሁ፡
 ዘብርት። ወአቀሥደሁ፡ ዘሐፂን። ወእምኔሆን፡ መንፈቀ፡ እገሪሁ፡ ኃፂን፡ ወመንፈቀ፡ እገሪሁ፡ ልሕኩት።
 ወእንዘ፡ ትኔጽር፡ ተመትረ፡ እብን፡ ዓቢይ፡ እምደብር፡ ዘእንበለ፡ እድ። ወወረደ፡ ዲበ፡ እንግድዓሁ፡
 ዘኃፂን፡ ወዘልሕኩት። ወሐረጸ፡ ለዝሉፉ። ወእምዝ፡ ተሐርፀ፡ በምዕር፡ ልሕኩቱሂ፡ ወሐፂኑሂ፡ ወብርቱሂ፡
 ወብሩሩሂ፡ ወወርቁሂ። ወኮነ፡ ከመ፡ ፀበል፡ ወኃሠረ፡ ዓውድ፡ ዘማዕረር፡ ወነሥኦ፡ ነፋስ፡ ኩሎ፡
 ወኢተዓውቀ፡ መካኑ፡ ኅበ፡ ነበረ። ወዝኩ፡ እብን፡ ዓቢይ፡ ዘቀጥቀጠ፡ ለምስል፡ ኮነ፡ ደብረ፡ ዓቢየ፡
 ወመልዓ፡ ኩሎ፡ ምድራ። ዝውእቱ፡ ህልምከ፡ ወፍካሬሁ፡ እንግር፡ ቅድመ፡ ንጉሥ፡ አንተ፡ ንጉሡ፡
 ነገሥት፡ ዘወሀበከ፡ አምላከ፡ ሰማይ፡ መንግሥተ፡ ጽኑዓ፡ ኃያል፡ ወክቡር፡ አንተ፡ በኩሉ፡ በሐውርት፡ ኅበ፡
 ይነብሩ፡ ደቂቀ፡ እጓለ፡ እመሕያው፡ ወአርዌ፡ ገዳም፡ ወአዕዋፈ፡ ሰማይ፡ ወዓሣተ፡ ባሕር፡ ወሀበከ፡ ውስተ፡
 እዴከ፡ ወሤመ

(col. 2) ከ፡ እግዚአ፡ ለኩሉ። አንተ፡ ውእቱ፡ ርእሱ፡ ዘወርቅ። ወእምድኅሬከ፡ ይቀውም፡ ካልዕ፡ ንጉሥ፡
 ዘይቴሐት፡ እምኔከ፡ ውእቱ፡ ዝኩ፡ ብሩር። ወዝኩሰ፡ ዘብርት፡ ሣልስ፡ መንግሥት፡ ዘይኳንን፡ ኩሎ።
 ወራብዕስ፡ መንግሥት፡ ጽኑዕ፡ ውእቱ፡ ከመ፡ ኃፂን፡ ወበከመ፡ ኃፂን፡ ያደክሞ፡ ለኩሉ፡ ወያደቅቆ። ከማሀ፡
 ይመውኦ፡ ለኩሉ፡ ወያገርሮ፡ ወዝንቱስ፡ ዘርኢከ፡ እገሪሁ፡ ወአፃብዒሁ፡ መንፈቁ፡ ልሕኩት፡ ወመንፈቁ፡
 ኃፂን፡ እስመ፡ መንግሥቱ፡ ንፋቅ፡ ውእቱ። ወእምጉንዱ፡ ለኃፂን፡ ይከውን፡ ውስቴቱ፡ በከመ፡ ርኢከ፡
 ኃፂን፡ ኢድሙር፡ ምስል፡ ልሕኩት፡ ወአጸብዓ፡ እገሪሁ፡ መንፈቁ፡ ኃፂን። ወመንፈቁ፡ ልሕኩት፡
 መንፈቁ፡ መንግሥቱ፡ ጽኑዕ፡ ወመንፈቁ፡ ይትቀጠቀጥ። ወዝኒ፡ ዘርኢከ፡ ኃፂን፡ ዘኢይዴመር፡ በልሕኩት፡
 ኅውስ፡ ከማሀ፡ ኅውሳን፡ እሙንቱ፡ ለዘርኦ፡ ዕጓለ፡ እመሕያው፡ ወኢኮኑ፡ ድሙራነ፡ ዝንቱ፡ ምስል፡ ዝኩ፡
 በከመ፡ ኢይዴመር፡ ኃፂን፡ ምስል፡ ልሕኩት። ወበመዋዕሊሆሙ፡ ለእሙንቱ፡ ነገሥት፡ ይመጽእ፡ አምላከ፡
 ሰማይ፡ ወይነሥእ፡ መንግሥተ፡ ዘለዓለም፡ ዘኢዮኃልቅ፡ ወዘኢይትሀውብ፡ ለካልእ፡ ሕዝብ፡ መንግሥቱ፡
 ይመውዕ፡ ወያገርሮ፡ ኩሎ፡ ነገሥተ፡ ወውእቱ፡ ይቀውም፡ ለዓለም፡ ዘከመ፡ ርኢከ። እምደብር፡ ተመትረ፡
 ዕብን፡ ዘእንበለ፡ ዕድ። ወሐረጸ፡ ልሕኩቶሂ፡ ወሐፂኖሂ፡ ወብርቶሂ፡ ወብሩሮሂ፡ ወወርቆሂ፡ ለአምላከ፡
 ዓቢይ፡ አርአዮ፡ ለንጉሥ፡ ዘሀለዎ፡ ይኩን፡ ከመዝ፡ ወእሙን፡ ሕልሙኒ፡ ወርቱዕ፡ ፍካሬሁ። ወሶቢሃ፡
 ሰገደ፡ ናቡከደነጾር፡ ንጉሥ፡ በገጹ፡ ለዳንኤል፡ ወአክበሮ፡ ፈድፋደ፡ ወመሐና፡ ወመዓረ፡ ሠናየ፡ ወመዓዛ፡
 አዘዘ፡ ሎቱ። ወተሠጥዎ፡ ንጉሥ፡ ለዳንኤል፡ ወይዜሎ፡ አማን፡

(col. 3) አምላክከሙ፡ አምላከ፡ አማልክት፡ ውእቱ፡ ወእግዚአ፡ አጋዕዝት፡ ውእቱ፡ ወንጉሠ፡ ነገሥት፡
 ዘይከሥት፡ ኅቡአ፡ እስመ፡ ክህልከ፡ አእምሮ፡ ዘንተ፡ ዘክዱን። ወአዕበዮ፡ ንጉሥ፡ ለዳንኤል፡ ውብዙኃ፡
 ፈተቶ፡ ወሀበ፡ ዓቢያተ፡ ወሤሞ፡ ለኩሉ፡ በሐውርተ፡ ባቢሎን፡ መልአከ፡ ወመኰንን፡ ለኩሉ፡ ጠቢባነ፡
 ባቢሎን። ወሰዓለ፡ ዳንኤል፡ በኅበ፡ ንጉሥ፡ ይሂሞሙ፡ ለሲናራቅ፡ ወሚሳቅ፡ ወአብድናን፡ ላዕለ፡ ኩሉ፡
 ግብረ፡ በሐውርተ፡ ባቢሎን፡ ወዳንኤል፡ ውስተ፡ ዓፀደ፡ ንጉሥ። ራእይ፡ ፫ራእይ፡ ፬ወአመ፡ ፲ወ፳ዓመተ፡
 መንግሥቱ፡ ለናቡከደነጾር፡ ንጉሥ፡ ገብረ፡ ምስል፡ ዘወርቅ፡ ኑጉ፡ ስሳ፡ በእመት፡ ወግድሙ፡ ሰድስ፡
 በእመት፡ ወዓቀሞ፡ ብሐቅለ፡ አዱራ፡ ዘብሔረ፡ ባቢሎን። ወላዓከ፡ ናቡከደነጾር፡ ንጉሥ፡ ያስተጋብኦ፡
 መኳንንተ፡ ወመላእክተ፡ መሳፍንተ፡ ወመገብተ፡ ወዓቢይተ፡ ወኃይላተ፡ ወነገሥተ፤ ወኩሎ፡ መላእክተ፡
 በሐውርተ፡ ባቢሎን፡ ይምጽኡ፡ ለመድቅሐ፡ ውእቱ፡ ምስል፡ ዘዓቀመ፡ ናቡከደነጾር፡ ንጉሥ፡ ወተጋብኦ፡
 መኳንንት፡ ወመሳፍንተ፡ ወመገብተ፡ ዓቢይት፡ ወሐባይት፡ ወነገሥት፡ ወመላእክተ፡ በሐውርት፡ ለመድቅሐ፡
 ውእቱ፡ ምስል፡ ዘዓቀመ፡ ናቡከደነጾር። ወቆመ፡ ንጉሥ፡ ቅድመ፡ ምስል፡ ወከልሐ፡ አዋዲ፡ በኃይል፡
 እንዘ፡ ይብል፡ ለክሙ፡ ይብለክሙ፡ አሕዛብ፡ ወሕዝብ፡ ወበሐውርት፡ እምከመ፡ ሰማዕክሙ፡ ቃለ፡ ቀርን፡

ወዕንዚራ፡ ወመሰንቆ፡ ውብዕዛ፡ ወማኅሌተ፡ ግነዩ፡ ወስግዱ፡ ለምስል፡ ዘወርቅ፡ ዘዓቀመ፡ ናቡከደነጾር፡
ንጉሥ፡ ዘኢገነዩ፡ ወዘኢሰገደ፡ በጊዜሃ፡ ይወድይዎ፡ ውስተ፡ እቶነ፡ እሳት፡ ዘይነድድ፡ ወእምዝ፡ ሶበ፡
ሰምዑ፡ አሕዛብ፡ ቃለ፡ ቀርን፡ ወዕንዚራ፡ ወመሰንቆ፡

F. 166r

(col. 1) ሰንቆ፡ ውብዕዛ፡ ወማኅሌተ፡ ወንዋየ፡ ተውኔት፡ ገነዩ፡ ኩሉ፡ አሕዛብ፡ ወሕዝብ፡ ወበሐውርት፡
ወስግዱ፡ ለምስል፡ ዘወርቅ፡ ዘዓቀመ፡ ናቡከደነጾር፡ ንጉሥ፡ ወእምዝ፡ መጽኡ፡ ሰብአ፡ ፋርስ፡
ወአስተዋደይዎሙ፡ ለአይሁድ፡ ኅበ፡ ናቡከደነጾር፡ ንጉሥ፡ ወይቤልዎ፡ ለዓለም፡ ሕየው፡ አንተ፡ ንጉሥ፡
አዘዝክ፡ በቃልክ፡ ትእዛዘ፡ ለኩሉ፡ አሕዛብ፡ እምከመ፡ ሰምዑ፡ ቃለ፡ ቀርን፡ ወዕንዚራ፡ ወመሰንቆ፡
ውብዕዛ፡ መማኅሌተ፡ ወከበሮ፡ ወኩሉ፡ ንዋየ፡ ተውኔት፡ ይግንዩ፡ ወይስግዱ፡ ለምስል፡ ዘወርቅ፡
ወለዘኢገነዩ፡ ወኢሰገደ፡ ይደይዎ፡ ውስተ፡ እቶነ፡ እሳት፡ ዘይነድድ፡ ወሀለዉ፡ ቪእደው፡ አይዑድ፡ እለ፡
ሂምኮሙ፡ ለግብረ፡ በሐውርተ፡ ባቢሎን፡ ሲድራቅ፡ ወሚሳቅ፡ ወአብደናን፡ እለ፡ ዓበዩ፡ ትእዛዘክ፡ ንጉሥ፡
ወኢአምላኩ፡ አምላክክ፡ ወኢሰገዱ፡ ለምስል፡ ዘወርቅ፡ ዘገበርከ፡ ወሶቤሃ፡ ተምዓ፡ ንጉሥ፡ ወአዘዘ፡
በመዓት፡ ያምጽእዎሙ፡ ለሲድራቅ፡ ወሚሳቅ፡ ወአብደናን፡ ወመጽኡ፡ ቅድመ፡ ንጉሥ፡ ወቆሙ፡
ወተሠጥዎሙ፡ ናቡከደነጾር፡ ወይቤሎሙ፡ አማንከመ፡ ዓበይስሙኑ፡ ሲድራቅ፡ ወሚሳቅ፡ ወአብደናን፡
ኢታምልኩ፡ ለአምላኪዩ፡ ወኢትሰግዱ፡ ለምስል፡ ዘወርቅ፡ ዘገበርኩ፡ ይእዘኒኪ፡ እመ፡ ጥቡአን፡ አንትሙ፡
እምከመ፡ ሰማዕክመ፡ ቃለ፡ ቀርን፡ ወመሰንቆ፡ ወማኅሌተ፡ ወከበሮ፡ ውብዕዛ፡ ወኩሉ፡ ንዋየ፡ ተውኔት፡
እስኩ፡ ወለእመ፡ ኢ[ት]ሰግዱ፡ ወኢተገንዩ፡ ለምስል፡ ዘወርቅ፡ ዘገበርኩ፡ በጊዜሃ፡ ይወድዩክመ፡ ውስተ፡
እቶነ፡ እሳት፡ ዘይነድድ፡ መኑ፡ ውእቱ፡ እግዚአብሔር፡ ዘያድኅክመ፡ እምእ

(col. 2) ዴዩ፡ ወአውሥእዎ፡ ሲድራቅ፡ ወሚሳቅ፡ ወአብደናን፡ ለናቡከደነጾር፡ ንጉሥ፡ ወይቤልዎ፡
ኢንፈቅድ፡ ንሕነሰ፡ ንሠጠውክ፡ በዝ፡ ነገር፡ አንጉሥ፡ ሀሎ፡ አምላክነ፡ ውስተ፡ ሰማይ፡ ዘኪያሁ፡ ናመልክ፡
ንሕነ፡ ወይክል፡ አድኅኖተነ፡ እምእዴክ፡ ወእምእቶነ፡ እሳት፡ ዘይነድድ፡ ወያነግፈነ፡ እምእዴክ፡ አንጉሥ፡
ከመ፡ ታእምር፡ አምላክክሂ፡ ኢናመልክ፡ ወለምስልሂ፡ ዘወርቅ፡ ዘዓቀምክ፡ ኢንሰግድ፡ ወሶቤሃ፡ ተምዓ፡
ናቡከደነጾር፡ ንጉሥ፡ ባሕቁ፡ ወተወለጠ፡ ርእየተ፡ ገጹ፡ በላዕለ፡ ሲድራቅ፡ ወሚሳቅ፡ ወአብደናን፡ ወአዘዘ፡
ያንድዱ፡ እቶነ፡ እሳት፡ ምስብዒተ፡ እስክ፡ በሕቁ፡ ይውዒ፡ ወአዘዘ፡ ዕደወ፡ ጽኑዓነ፡ ወኃያላነ፡
ይእሥርዎሙ፡ ለሲድራቅ፡ ወሚሳቅ፡ ወአብደናን፡ ወይውርዎሙ፡ ውስተ፡ እቶነ፡ እሳት፡ ዘይነድድ፡
ወሶቤሃ፡ እሙንቱ፡ ዕደው፡ አሠርዎሙ፤ እደዊሆሙ፡ ወእገሪሆሙ፡ ምስለ፡ ድርማንቃቲሆሙ፡ ወምስለ፡
አሣዕኒሆሙ፡ ወምስለ፡ አልባሰ፡ አቀኅደሆሙ፡ ወምስለ፡ አልባሲሆሙ፡ ወረዎሙ፡ ውስተ፡ እቶነ፡
እሳት፡ ዘይነድድ፡ እስመ፡ ኅየለ፡ ቃለ፡ ንጉሥ፡ ጥቀ፡ ወአንደዱ፡ እሳተ፡ ዕቶን፡ ባሕቁ፡ ምስብዒተ፡
ወወረዱ፡ ቪደቂቅ፡ ሲድራቅ፡ ወሚሳቅ፡ ወአብደናን፡ ማዕከለ፡ ዕቶነ፡ እሳት፡ እንዘ፡ ዕሠራን፡ እደዊሆሙ፤
ወእገሪሆሙ፡ ወአንሶሰው፡ ማዕከለ፡ እሳት፡ ወባረክዎ፡ ለእግዚአብሔር፡ ወአእኩትዎ፡ ለእግዚእ፡ ናሁ፡
ወቆመ፡ አዛርያ፡ ወጸለየ፡ ከመዝ፡ ወከሠተ፡ አፉሁ፡ በማዕከለ፡ እሳት፡ ወይቤ፡ ይትባረክ፡ እግዚአብሔር፡
አምላክ፡ አበዊነ፡ እኩት፡ ወስቡሕ፡ ሰምክ፡ ለዓለም፡ እስመ፡ ጻድቅ፡ አንተ፡ በኩሉ፡ ዘአምእእክ፡ ላዕሌነ፡
እሙን፡ ኩሉ፡ ግብርክ፡ ወር

(col. 3) ቱዕ፡ ኩሉ፡ ፍናዊክ፡ ወጽድቅ፡ ኩሉ፡ ኩነኔክ፡ ወገበርክ፡ ፍትሐ፡ ወርትዓ፡ በኩሉ፡ ዘገበርክ፡
ለነ፡ ወዲበ፡ ሀገረ፡ አበዊነ፡ ኢየሩሳሌም፡ ቅድስት፡ እስመ፡ በኩነኔ፡ ርትዕክ፡ አምእእክ፡ ዘኩሉ፡ በእንተ፡
ኃጢአትነ፡ እስመ፡ አበስነ፡ ወጌገይነ፡ ዘኃደግናክ፡ ዓመ፡ በኩሉ፡ ወኢሰማዕነ፡ ትእዛዘክ፡ ኢዓቀብነ፡
ወኢገበርክ፡ ዘከመ፡ አዘዝክ፡ ከመ፡ ይኩን፡ ሠናየ፡ ላዕሌነ፡ ኩሉ፡ ዘአምእእክ፡ ላዕሌነ፡ ወኩሉ፡ ዘገበርክ፡
ዲቤነ፡ በኩነኔ፡ ጽድቅክ፡ ረሰይክ፡ ወመጠውክነ፡ ውስተ፡ እደ፡ ፀርነ፡ ኃጥአን፡ ወዓላውያን፡ እለ፡ ርሁቃን፡
ወግሑሣን፡ እምእክ፡ ወንጉሥ፡ ዓማዒ፡ ወእኩይ፡ እምኩሉ፡ ምድር፡ ወይእዘኒ፡ አኮ፡ መጠንነ፡ ንክሥት፡

አፋነ። ኃፍረተ፡ ወኃሣረ፡ ዘኮነነ፡ ለአግብርቲክ። ወለአለ፡ ይፈርሐክ። ኢትመጥወነ፡ ለግሙራ፡ በአንተ፡ ስምክ፡ ወኢትሚጥ፡ ኪዳነክ፡ ወኢታርሕቅ፡ ምሕረተክ፡ እምኔነ። በእንተ፡ አብርሃም፡ ፍቁርክ። ወበእንተ፡ ይስሐቅ፡ ቊልዔክ። ወበእንተ፡ እስራኤል፡ ቅዱስክ። እለ፡ ተናገርኮሙ፡ ወትቤሎሙ፡ ከመ፡ ታብዝኅ፡ ዘርአሙ፡ ከመ፡ ኮከበ፡ ሰማይ፡ ወከመ፡ ጥፃ፡ ዘድንጋገ፡ ባሕር። እስመ፡ ውሑዳን፡ እሙንቱ፡ እምኩሉ፡ አሕዛብ። ወኮነ፡ ኅሡራነ፡ በኩሉ፡ ምድር፡ ዮም፡ በእንተ፡ ኃጢአትነ። አልቦ፡ በዝ፡ መዋዕል፡ መልአክ፡ ኢነቢይ፡ ወኢንጉሥ። ኢቊርባን፡ ወኢመሥዋዕት፡ ወኢኅበ፡ ያጸነሐንሑ፡ ዕጣነ፡ ወኢብሔር፡ ኅበ፡ እለ፡ ይፈርዩ፡ በቅድሜክ። ወይርከቡ፡ ሣህለክ። ዳዕሙ፡ በነፍስ፡ የዋህ፡ ወበመንፈስ፡ ትሑት፡ ተወከፍ፡ ለነ። ከመ፡ ዘመሥዋዕተ፡ ሐራጊት፡ ወአልህምት። ወከመ፡ ዘአዕላፍ፡ አባግዕ፡ ስቡሐን። ከማሁ፡

F. 166v

(col. 1) ይኩን፡ መሥዋዕቲነ፡ በቅድሜክ፡ ዮም። ወፍጹመ፡ ይኩን፡ በኅቢክ፡ ወይትፈጸም፡ በድኅሬክ፡ ከመ፡ ኢይትኃፈሩ፡ ኩሎሙ፡ እለ፡ ይትዌከሉክ፡ ወይእዜኒ፡ ንተልወክ፡ በኩሉ፡ ልብነ፡ ወንፈርሀክ፡ ወነኃሥሥ፡ ገጸክ፡ ዳዕሙ፡ ኢታስተኃፍረነ፡ ወግበር፡ ምስሌነ፡ በከመ፡ ተመይጦትክ፤ ወበከመ፡ ብዝኃ፡ ምሕረትክ፡ አድኅነነ፡ በተአምሪክ፤ ሀብ፡ ስብሐተ፡ ለስምክ፡ እግዚአብሔር። ወኢይኅሠሩ፡ እለ፡ የኃሡክ፡ ይትኃፈሩ፡ ኩሎሙ፡ እለ፡ አርአይዎሙ፡ ሥቃየ፡ ለአግብርቲክ። ይትኃፈሩ፡ በኩሉ፡ ትዕግልቶሙ፡ ወይትቀጥቀጥ፡ ኃይሎሙ፡ ወያእምሩ፡ ከመ፡ አንተ፡ እግዚአብሔር፡ አምላክ፡ ባሕቲትክ፡ ስቡሕ፡ በኩሉ፡ ምድር፡ ወበኩሉ፡ ዓለም። ራእይ፡ ወኢኃደጉ፡ አስተዋድዮቶሙ፡ እለ፡ ይወድዩ፡ ውስተ፡ እቶነ፡ እሳት፡ ዘይነድድ፡ ወዓልያን፡ ኅበ፡ ንጉሥ። ውስተ፡ እሳቱ፡ ተይ፡ ወፒሳ፡ ወሠጢጽዮን፡ ወቀለምጢዳ፡ ወተለዓለ፡ ነበልባሉ፡ እምዕቶን፡ ጃወጀበእመት፡ ወያንሰሰው። ወያውዒ፡ ከላዳውያነ፡ ዘተረክቡ፡ ኅበ፡ እቶሞ፡ ለፋርስ፡ ወወረደ፡ መልዓክ፡ እግዚአብሔር፡ ምስለ፡ አናንያ፡ ወአዛርያ፡ ወሚሳኤል፡ ኅበ፡ እቶነ፡ እሳት። ወዘበጦ፡ ለነበልባለ፡ እሳት፡ ዘእቶን፡ ወረሰዮ፡ በማዕክለ፡ እቶን፡ ከመ፡ ነፋስ፡ ቈረር፡ ወኢለክፎሙ፡ ወኢያመንደቦሙ፡ ወኢምንተኒ፡ ወኢሰሐጦሙ፡ ወኢያጽዓቆሙ፡ ሶቤሃ፡ እሙንቱ፡ ሠለስቲሆሙ፡ ነበቡ፡ ኅበረ፡ በ፩አፍ፡ ሰብሑ፡ ወአእኩቱ፡ ወባረክዎ፡ ለእግዚአብሔር፡ በውስተ፡ እቶን። ወይቤሉ፡ ይትባረክ፡ እግዚአብሔር፡ አምላክ፡ አበዊነ። ስቡሕኒ፡ ውእቱ፡ ወልዑልኒ፡ ውእቱ፡ ለዓለም። ወይትባረክ፡ ስመ፡ ስብሐቲሁ፡ ቅዱስ። ስቡሕኒ፡ ውእቱ፡

(col. 2) ወልዑልኒ፡ ውእቱ፡ በኩሉ፡ ዓለም። ቡሩክ፡ አንተ፡ በጽርኃ፡ ቅድሳተ፡ ስብሐቲክ። ስቡሕኒ፡ አንተ፡ ወእኩት፡ አንተ፡ ለዓለም። ቡሩክ፡ አንተ፡ ዘትሬኢ፡ ቀላያተ፡ ነቢረክ፡ ላዕለ፡ ኪሩቤል። ስቡሕኒ፡ አንተ፡ ወልዑልኒ፡ አንተ፡ ለዓለም። ቡሩክ፡ አንተ፡ በዲበ፡ መንበረ፡ መንግሥትክ። ስቡሕኒ፡ አንተ፡ ወቡሩክ፡ አንተ፡ ለዓለም። ቡሩክ፡ አንተ፡ በመልዕልተ፡ ሰማያት። ስቡሕኒ፡ አንተ፡ ወክቡርኒ፡ አንተ፡ ለዓለም። ይባርክዎ፡ ኩሉ፡ ግብረ፡ እግዚእ፡ ለእግዚአብሔር። ስቡሕኒ፡ ውእቱ፡ ወልዑልኒ፡ ውእቱ፡ ለዓለም። ይባርክዎ፡ ሰማያት፡ ለእግዚአብሔር። ስቡሕኒ፡ ውእቱ፡ ወልዑልኒ፡ ውእቱ፡ ለዓለም። ይባርክዎ፡ መላእክተ፡ እግዚእ፡ ለእግዚአብሔር። ስቡሕኒ፡ ውእቱ፡ ወልዑልኒ፡ ውእቱ፡ ለዓለም። ይባርክዎ፡ ኩሉ፡ ማያት፡ ዘመልእልተ፡ ሰማያት፡ ለእግዚአብሔር። ስቡሕኒ፡ ውእቱ፡ ወልዑልኒ፡ ውእቱ፡ ለዓለም። ይባርክዎ፡ ኩሉ፡ ኃይለ፡ እግዚእ፡ ለእግዚአብሔር። ይባርክዎ፡ ፀሐይ፡ ወወርኅ፡ ለእግዚአብሔር። ይባርክዎ፡ ከዋክብተ፡ ሰማይ፡ ለእግዚአብሔር፡ ይባርክዎ፡ ጠል፡ ወዝናም፡ ለእግዚአብሔር። ይባርክዎ፡ ኩሉ፡ መንፈስ፡ ለእግዚአብሔር። ይባርክዎ፡ እሳት፡ ወላህብ፡ ለእግዚአብሔር። ይባርክዎ፡ ሌሊት፡ ወመዓልት፡ ለእግዚአብሔር፡ ይባርክዎ፡ ጠል፡ ወዓውል፡ ለእግዚአብሔር። ይባርክዎ፡ ቊር፡ ወአስሐትያ፡ ለእግዚአብሔር። ይባርክዎ፡ በርህ፡ ወጽልመት፡ ለእግዚአብሔር። ይባርክዎ፡ ደደክ፡ ወመርቁ፡ ለእግዚአብሔር። ይባርክዎ፡ በረድ፡ ወጊሜ፡ ለእግዚአብሔር። ይባርክዎ፡ መብረቅ፡ ወደመና፡

ለእግዚአብሔር፡ ትባርከ፡ ምድር፡ ለእግዚአብሔር። ይባርክዎ፡ አድባር፡ ወአውግር፡ ለእግዚአብሔር። ይባር[ክዎ፡]

(col. 3) ኩሉ፡ ዘይበቀላ፡ ውስተ፡ ምድር፡ ለእግዚአብሔር። ይባርክዎ፡ ቀላያት፡ ለእግዚአብሔር። ይባርክዎ፡ ባሕር፡ ወአፍላግ፡ ለእግዚአብሔር። ይባርክዎ፡ አንበር፡ ወኩሉ፡ ዘይትሐወስ፡ ውስተ፡ ማይ፡ ለእግዚአብሔር። ይባርክዎ፡ ኩሉ፡ አዕዋፈ፡ ሰማይ፡ ለእግዚአብሔር። ይባርክዎ፡ ኩሉ፡ አራዊት፡ ወእንሰሳ፡ ለእግዚአብሔር። ይባርክዎ፡ ደቂቀ፡ እንሰ፡ እመሕያው፡ ለእግዚአብሔር። ይባርክዎ፡ እስራኤል፡ ለእግዚአብሔር። ይባርክዎ፡ ካህናተ፡ እግዚእ፡ ለእግዚአብሔር። ይባርክዎ፡ ለግብርተ፡ እግዚእ፡ ለእግዚአብሔር። ይባርክዎ፡ መንፈስ፡ ወነፍስ፡ ጻድቃን፡ ለእግዚአብሔር። ይባርክዎ፡ ጻድቃን፡ ወትሑታን፡ ልብ፡ ለእግዚአብሔር። ይባርክዎ፡ አናንያ፡ ወአዘርያ፡ ወሚሳኤል፡ ለእግዚአብሔር። ስቡሕኒ፡ ውእቱ፡ ወልዑልኒ፡ ውእቱ፡ ለዓለም። እስመ፡ አድኃነን፡ እምእደ፡ ሲኦል፡ ወእምእደ፡ ሞት፡ ባልሐነ። ወእምዕቶን፡ እሳት፡ ዘይነድድ፡ አንገፈነ፡ ወአውፅአን፡ እማዕከለ፡ ነበልባል። ግነዩ፡ ለእግዚአብሔር፡ እስመ፡ ጌር፡ እስመ፡ ለዓለም፡ ምሕረቱ። ባርክዎ፡ ለእግዚአብሔር፡ ኩልክሙ፡ አሕዛብ፡ እለ፡ ትፈርህዎ፡ ለአምላክ፡ አማልክት። ሰብሕዎ፡ ወግነዩ፡ ሎቱ፡ እስመ፡ ለኩሉ፡ ዓለም፡ ምሕረቱ። ወሰምዎሙ፡ ናቡከደነጾር፡ ንጉሥ፡ እንዘ፡ ይሴብሑ፡ ወአንከረ፡ ወተንሥኦ፡ ወቆመ፡ ፍጡን፡ ወይቤሎሙ፡ ለወዓልቱ፡ አኮኑ፡ ፫ዕደወ፡ ወደይነ፡ ማዕከለ፡ እሳት፡ ዕሡራነ። ወይቤልዎ፡ እወ፡ ንጉሥ፡ ወይቤ፡ ንጉሥ፡ አንሰ፡ እሬኢ፡ ዝየ፡ ፬ዕደወ፡ ፍቱሐን፡ ወያንሶስዉ፡ ማዕከለ፡ እሳት፡ ወአልቦ፡ ዘለከፎሙ። ወገጹ፡ ለራብዕ፡ ከመ፡ ወልደ፡ እግዚአብሔር፡

F. 167r

(col. 1) ይመስል። ወእምዝ፡ ሐረ፡ ናቡከደነጾር፡ ጎበ፡ ጥጎተ፡ እቶን፡ እሳት፡ ዘይነድድ። ወይቤሎሙ፡ ሲድራቅ፡ ወሚሳቅ፡ ወአብደናን፡ አግብርተ፡ እግዚአብሔር፡ ልዑል። ንዑ፡ ፃዑ፡ ዝየ፡ ወወፅኡ፡ ሲድራቅ፡ ወሚሳቅ፡ ወአብደናን፡ እማዕከለ፡ እቶን፡ እሳት፡ ወተጋብሑ፡ መገብት፡ ወመኳንንት፡ ወመላእክት፡ ወኃያላን። ዘንጉሥ። ወርእይዎሙ፡ ለእሙንቱ፡ ዕደወ፡ ከመ፡ ኢቀረበሙ፡ እሳት፡ ሥጋሆሙ፡ ወኢለከፎሙ፡ ሥዕርተ፡ ርእሶሙ፡ ወኢተወለጠ፡ ርእየቶሙ። ወአልቦ፡ ላዕሌሆሙ፡ ጼና፡ ዘእሳት፡ ወሰገደ፡ ንጉሥ፡ ለእግዚአብሔር፡ በቅድሚሆሙ፡ ወአውሥኦ፡ ናቡከደነጾር፡ ወይቤ፡ ይትባረክ፡ እግዚአብሔር፡ አምላክ፡ ሲድራቅ፡ ወሚሳቅ፡ ወአብደናን፡ ዘፈነወ፡ መልአክ፡ ወአድኃነ፡ ነፍስ፡ አግብርተሁ፡ እለ፡ ተወከሉ፡ ቦቱ። ወሚጡ፡ ቃለ፡ ንጉሥ፡ ወሀበሙ፡ ነፍሶሙ፡ ለእሳት፡ ከመ፡ ኢያምልኩ፡ ወኢይሰግዱ፡ ለካልዕ፡ አምላክ፡ ዘእንበለ፡ ለአምላኮሙ። ወአነሂ፡ አዘዝኩ፡ ለኩሉ፡ አሕዛብ፡ ወነገድ፡ ወበሐውርት። እመቦ፡ ዘነበበ፡ ወዘጸረፈ፡ ላዕለ፡ አምላክ፡ ሲድራቅ፡ ወሚሳቅ፡ ወአብደናን፡ ይትኩንን፡ ነፍሱ፡ ወይትበርበር፡ ቤቱ። እስመ፡ አልቦ፡ ካልዕ፡ አምላክ፡ ዘያድሳን፡ ከመዝ፡ ወሶቤሃ፡ ሢሞሙ፡ ንጉሥ፡ ለሲድራቅ፡ ወሚሳቅ፡ ወአብደናን፡ ላዕለ፡ ግብረ፡ በሐውርተ፡ ባቢሎን፡ ወአዕበዮሙ፡ ወአኩነኖሙ፡ በኩሉ፡ አይሁድ። እለ፡ ውስተ፡ መንግሥቱ፡ ሀለዉ፡ ይቤ፡ ናቡከደነጾር፡ ንጉሥ፡ ለኩሉ፡ አሕዛብ፡ ወነገድ፡ ወበሐውርት፡ ዘኩሉ፡ ምድር። ሰላምኦ፡ ይብዛኅክሙ፡ ትእምርተ፡ ወመንክረ፡ ዘገብረ፡ ሊተ፡ እግዚአብሔር፡ ልዑል። ወአደመ

(col. 2) ኒ፡ በቅድሚየ፡ እንግርክሙ። እስመ፡ ዓቢይ፡ ወጽኑዕ፡ ውእቱ፡ መንግሥቱ፡ መንግሥት፡ ዘለዓለም፡ ወምኩናኒ፡ ለትውልደ፡ ትውልድ፡ አነ፡ ናቡከደነጾር። እንዘ፡ እትፌሣሕ፡ በቤትየ፡ ወእደሎ፡ ሐለምኩ፡ ሕልመ፡ ወገረመኒ፡ ወደንገፅኩ፡ በውስተ፡ ምስካብየ፡ ወርእይየ፡ ርእስየ፡ ተሀውከተኒ፡ ሕሊናየ። ወአነ፡ አዘዝኩ፡ ይባኡ፡ ጎቤየ፡ ኩሉ፡ ጠቢባነ፡ ባቢሎን፡ ከመ፡ ይንግሩኒ፡ ፍካሬሁ፡ ለሕልምየ። ወመጽኡ፡ ሰብኦ፡ ሰገል፡ ወሰብኦ፡ ሥራይ፡ ማዕምራን፡ ወመፈክራን፡ ወነገርክዎሙ፡ አነ፡ ሕልምየ፡ ቅድሚሆሙ፡

ወኢያይድዑኒ፡ ፍካሬሁ፡ እስከ፡ አመ፡ ቦኦ፡ ዳንኤል፡ ዘስሙ፡ ብልጣሶር፡ በስመ፡ አምላኪየ፡ ዘመንፈሰ፡ እግዚአብሔር፡ ላዕሌሁ፡ እቤሎ፡ ለብልጣሶር፡ መልአክሙ፡ ለአጳይዶን፡ ወኦነ፡ አእመርኩ፡ ከመ፡ መንፈሰ፡ እግዚአብሔር፡ ዲቤከ፡ ወኩሉ፡ ዘኅቡዕ፡ ኢይሰዓነከ፡ ሰማዕ፡ ነገረ፡ ሕልምየ፡ ዘርኢኩ፡ ወንግረኒ፡ ፍካሬሁ፡ ወበውስተ፡ ምስካብየ፡ ርኢኩ፡ ወናሁ፡ ዕፅ፡ ዓቢይ፡ ውስተ፡ ማዕከለ፡ ምድር፡ ወነዋህ፡ ጥቀ፡ ወዓቢይ፡ ዕፅ፡ ወፅኑዕ፡ ወበጽሐ፡ ቆሙ፡ እስከ፡ ሰማይ፡ ወአዕፁቂሁ፡ እስከ፡ አጽናፈ፡ ምድር፡ ወሠናይ፡ ቈጽሉ፡ ወፍሬሁኒ፡ ብዙኅ፡ ወኩሉ፡ እምኔሁ፡ ይሴሰዩ፡ ወያጸሉ፡ ታሕቲሁ፡ አራዊተ፡ ገዳም፡ ወይነብሩ፡ ውስተ፡ አዕፁቂሁ፡ አዕዋፈ፡ ሰማይ፡ ወእምኔሁ፡ ይበልዕ፡ ኩሉ፡ ዘሥጋ፡ ወርኢኩ፡ በራዕየ፡ ሌሊት፡ በውስተ፡ ምስካብየ፡ ወናሁ፡ ዒር፡ ቅዱስ፡ እምሰማይ፡ ወረደ፡ ወከልሐ፡ በኃይል፡ ከመዝ፡ ይብል፡ ግዝምዋ፡ ለዛቲ፡ ዕፅ፡ ወምትሩ፡ አዕጺቂሃ፡ ወዝርወ፡ ፍሬሃ፡ ይትሀወኩ፡ አራዊት፡ ዘታሕቲሃ፡ ወአዕዋፍኒ፡ ውስተ፡ አዕፁቂሃ፡ ዳዕሙሥርዋ፡ ወጉንዳ፡ ኅድጉ፡ ው

(col. 3) ስተ፡ ምድር፡ በመዋቅሕተ፡ ሐዲን፡ ውብርት፡ ውስተ፡ ሐመልማል፡ ዘአፍአ፡ ወበጠለ፡ ሰማይ፡ ይንበር፡ ወምስለ፡ አራዊት፡ መክፈልቱ፡ ውስተ፡ ሣዕረ፡ ምድር፡ ወይትወለጥ፡ ልቡ፡ እምሰብእ፡ ወይሁብዎ፡ ልቡ፡ አርዌ፡ ፯ዓመት፡ እስከ፡ የኃልፍ፡ ላዕሌሁ፡ በኩነኔ፡ ልዑል፡ ወበቃል፡ ቅዱስ፡ ትእዛዝ፡ ከመ፡ ያእምሩ፡ ኩሉ፡ ሕያዋን፡ ከመ፡ እግዚአብሔር፡ ይኳንን፡ መንግሥተ፡ እጋለ፡ እመሕያው፡ ወለዘፈቀደ፡ ይሁብ፡ ወትዕቢቱ፡ ለሰብእ፡ ያንሥሮ፡ ከመዝ፡ ሕልመ፡ ዘሐለምኩ፡ አነ፡ ናቡከደነጾር፡ ንጉሥ፡ ወአንተ፡ ብልጣሶር፡ ፍካሬሁ፡ ንግረኒ፡ እስመ፡ ኩሉሙ፡ ጠቢባነ፡ መንግሥትየ፡ ስዕኑ፡ ነገሮትየ፡ ፍካሬሁ፡ ወአንተስ፡ ዳንኤል፡ ትክል፡ እስመ፡ መንፈሰ፡ እግዚአብሔር፡ ቅዱስ፡ ላዕሌከ፡ ሶቤሃ፡ ዳንኤል፡ ዘስሙ፡ ብልጣሶር፡ ሐለየ፡ መጠነ፡ አሐቲ፡ ሰዓት፡ ወተሀወኩ፡ ሕሊናሁ፡ ወተሠጥዎ፡ ብልጣሶር፡ ለንጉሥ፡ ወይቤ፡ እግዚእየ፡ ይኩን፡ ህልምከ፡ ላዕለ፡ ጸላዕትከ፡ ወፍካሬሁኒ፡ ለፀርከ፡ ዕፅ፡ ዘርኢከ፡ ዓቢየ፡ ወበጽሐ፡ ኑጉ፡ እስከ፡ ሰማይ፡ ወበጽሐ፡ ስፍሐ፡ እስከ፡ አጽናፈ፡ ምድር፡ አዕፁቂሁ፡ ወቈጽሉሂ፡ ጽፉቅ፤ ወፍሬሁኒ፡ ብዙኅ፡ ወኩሉ፡ ይሴሰዩ፡ እምኔሁ፡ ወይነብሩ፡ አራዊተ፡ ገዳም፡ ታሕቲሁ፡ ወያጸሉ፡ አዕዋፈ፡ ሰማይ፡ ውስተ፡ አዕፁቂሁ፡ አንተ፡ ውእቱ፡ ንጉሥ፡ ዘአበይከ፡ ወጸናዕከ፡ ፈድፋደ፡ ዓበይከ፡ ወበጽሐ፡ ስምከ፡ እስከ፡ ሰማይ፡ ወኩነኔከ፡ እስከ፡ አጽናፈ፡ ምድር፡ ወዝኒ፡ ዘርኢከ፡ ዔር፡ ቅዱስ፡ ወልዑል፡ ወረደ፡ እምሰማይ፡ ወይቤ፡ ግዝምዋ፡ ለዛቲ፡ ዕፅ፡ ወአማስንዋ፡ ወዳዕሙ፡ ሥርዋ፡ ወጉንዳ፡ ኅድጉ፡ ውስተ፡ ም

F. 167v

(col. 1) ድር፡ በመዋቅሕተ፡ ሐዲን፡ ውብርት፡ ውስተ፡ ሐመልማል፡ ዘአፍአ፡ ይንበር፡ ወበጠለ፡ ሰማይ፡ ምስለ፡ አራዊተ፡ ገዳም፡ መክፈልቱ፡ እስከ፡ የኃልፍ፡ ፯ዓመት፡ ላዕሌሁ፡ ዝንቱ፡ ውእቱ፡ ፍካሬሁ፡ ንጉሥ፡ ኩነኔ፡ ልዑል፡ በጽሐ፡ ለእግዚእየ፡ ንጉሥ፡ ወይሰድዱከ፡ እምሰብእ፡ ወትነብር፡ ምስለ፡ አራዊተ፡ ነዳም፡ ወትትረዓይ፡ ሣዕረ፡ ከመ፡ ላህም፡ ወትነብር፡ በጣሰ፡ ሰማይ፡ ፯ዓመት፡ እስከ፡ የኃልፍ፡ ላዕሌከ፡ ወእስከ፡ ተአምር፡ ከመ፡ ልዑል፡ ይኳንን፡ መንግሥተ፡ ዕጋለ፡ እመሕያው፡ ወለዘፈቀደ፡ ይሁብ፡ ወዝኒ፡ ዘርኢከ፡ ዘይቤ፡ ኅድጉ፡ ሥርዋ፡ ወጉንዳ፡ ለዕፅ፡ ውስተ፡ ምድር፡ መንግሥትከ፡ ለከ፡ ይጸንሐከ፡ እስከ፡ ተአምር፡ ኩነኔሁ፡ ለልዑል፡ በአንተዝ፡ ያሥምርከ፡ ምክርየ፡ ንጉሥ፡ በምጽዋት፡ ወበጽድቅ፡ ትድኅን፡ ወኃጢአተከኒ፡ በምሒረ፡ ነዳይ፡ እስከ፡ ይስሪ፡ ለከ፡ እግዚአብሔር፡ ጌጋየከ፡ ዝ፡ ኩሉ፡ በጽሐ፡ ለናቡከደነጾር፡ ንጉሥ፡ ወእምድኅረ፡ ፲ወ፪ወርኅ፡ መጽአ፡ ወበጽሐ፡ ኅበ፡ ጽርኃ፡ መንግሥቱ፡ ዘባቢሎን፡ እንዝ፡ ያንሰሱ፡ ተሠጥወ፡ ንጉሥ፡ ወይቤ፡ አኮኑ፡ ዝንቱ፡ ባቢሎን፡ ዓባይ፡ እንተ፡ ሐነጽኩ፡ ለቤተ፡ መንግሥትየ፡ በጽንዓ፡ ኃይልየ፡ ወለትርሢተ፡ ክብርየ፡ ወእንዝ፡ ዓዲ፡ ቃል፡ ውስተ፡ አፈ፡ ንጉሥ፡ መጽአ፡ ቃል፡ እምሰማይ፡ ወይቤሎ፡ ለከ፡ ይብለከ፡ አናቡከደነጾር፡ ንጉሥ፡ ኃለፈት፡ መንግሥትከ፡ እምኔከ፡ ወይሰድዱከ፡ እምሰብእ፡ ወትነብር፡ ምስለ፡ አርዌ፡ ገዳም፡ ወትትረዓይ፡ ሣዕረ፡ ከመ፡ ላህም፡ ወየኃልፍ፡ ላዕሌከ፡ ፯ዓመት፡ እስከ፡ ተአምር፡ ከመ፡ ልሁል፡ ይኳንን፡ መን

(col. 2) ግሥተ፡ ዕጓለ፡ እመሕያው፡ ወለዘፈቀደ፡ ይሁብ። ወውእተ፡ ጊዜ፡ በጽሑ፡ ለናቡከደነጾር፡ ዝኸሉ፡ ነገር፡ ወተሰደ፡ እምሰብእ፡ ወተርእየ፡ ሣዕረ፡ ከመ፡ ላህም፡ ወተሣረየ፡ ሥጋሁ፡ እምጠለ፡ ሰማይ፡ እስከ፡ ልህቀ፡ ሥዕርቱ፡ ከመ፡ አንበሳ፡ ወጽፈሪሁ፡ ከመ፡ ንስር። ወእምድኅረ፡ እማንቱ፡ መዋዕል፡ አነ፡ ናቡከደነጾር፡ አንሣእኩ፡ አዕይንትየ፡ እስከ፡ ሰማይ፡ ወገብአኒ፡ ልብየ። ወባረከዎ፡ ለልዑል፡ ወአክኡትክዎ፡ ለዘሕያው፡ ወሰባሕክዎ፡ ለዘምኸናኑ፡ ምኸናን፡ ዘለዓለም። ወመንግሥቱ፡ ለትውልደ፡ ትውልድ። ወኸሎሙ፡ አለ፡ ይነብሩ፡ ውስተ፡ ምድር፡ ከመ፡ ወኢምንት፡ እሙንቱ፡ ወይገብር፡ በከመ፡ ዘፈቀደ፡ ለኃይለ፡ ሰማይ። ወለዘሂ፡ ይነብር፡ ዲበ፡ ምድር። ወአልቦ፡ ዘይትቃወማ፡ ለእዴሁ፡ ወይቤሎ፡ ምንተ፡ ገበርከ፡ ውእተ፡ ጊዜ፡ ገብአኒ፡ ልብየ፡ ወመጻእኩ፡ ውስተ፡ ክብረ፡ መንግሥትየ፡ ወተሠውጠ፡ ሕሊናየ፡ ወራእይየ፡ ወኃሠሠኒ፡ መገብትየ፡ ወመላእክትየ፡ ወጸናዕኩ፡ በመንግሥትየ፡ ወተወሰኩ፡ ዕበየ፡ ፈድፋድ። ይእዜኒ፡ አነ፡ ናቡከደነጾር፡ እሴብሐ፡ ወአዓኸቶ፡ ወአሌዕሎ፡ ለንጉሠ፡ ሰማይ፡ እስመ፡ ጽድቅ፡ ኸሉ፡ ግብሩ፡ ወርቁዕ፡ ፍናዊሁ። ወለኸሎሙ፡ እለ፡ የሐውሩ፡ በትዕቢት፡ ይክል፡ አኅሥሮቶሙ፡ ራዕይ፡ ዘዳንኤል፡ ብልጣሶር፡ ንጉሥ፡ ገብረ፡ ምሳሐ፡ ለመጉበተ፡ ወአስተጋብእ፡ ፲፪ብእሴ፡ ወአስተየ፡ ወይነ፡ ለ፲፪ዕደው፡ ወእንዘ፡ ይሰቲ፡ ወይነ፡ ብልጣሶር፡ ሰኪሮ፡ ይቤ፡ አምጽኡ፡ ንዋየ፡ ወርቅ፡ ወብሩር፡ ዘአምጽኡ፡ ናቡከደነጾር፡ አቡየ፡ እምቤተ፡ መቅደስ፡ ዘኢየሩሳሌም፡ ወይስተዩ፡ ቦቱ፡ ንጉሥ፡ ወመገብቱ፡ ወአንስቲያ

(col. 3) ሁ፡ ወዕቁባቲሁ። ወአምጽኡ፡ ንዋየ፡ ወርቅ፡ ወብሩር፡ ዘአምጽኡ፡ እምቤተ፡ መቅደስ፡ ዘኢየሩሳሌም። ወስተዩ፡ ቦቱ፡ ንጉሥ፡ ወመገብቱ፡ ወመላእክቲሁ፡ ወዕቁባቲሁ፡ ወአንስቲያሁ፡ ወይነ፡ ወአዕኩቱ፡ አማልክቲሆሙ፡ ዘወርቅ፡ ወዘብሩር፡ ወዘኃፂን፡ ወዕፅ፡ ወዘልሕኸት፡ ወበይእቲ፡ ሰዓት፡ ወዕአት፡ አፅባዕተ፡ እደ፡ ሰብእ፡ ወጸሐፈት፡ ቅድመ፡ ማኅቶት፡ ውስተ፡ መርገ፡ አረፍት፡ ዘቤተ፡ ንጉሥ። ወርእየ፡ ንጉሥ፡ አፅባዕተ፡ አደ፡ ሰብእ፡ እንዘ፡ ይጽሕፍ። ወሶቤሃ፡ ጸልመ፡ ገጹ፡ ለንጉሥ፡ ወደንገጸ፡ ልቡ፡ ወተፈትሐ፡ መሌሊተ፡ ሐቋሁ፡ ወተጐድዓ፡ ብረኪሁ፡ ወአውየወ፡ ንጉሥ፡ በቃሉ፡ ከመ፡ ያምጽኡ፡ ሎቱ፡ መሠርያነ፡ ወሰብእ፡ ሰገል። ወይቤሎሙ፡ ለጠቢባነ፡ ባቢሎን፡ ለዘአንበቦ፡ ለዝ፡ መጽሐፍ፡ ወነገረኒ፡ ፍካሬሁ፡ አለብሶ፡ ሜላተ። ወአዓንቆ፡ በዝግና፡ ወርቅ፡ ውስተ፡ ክሳዱ፡ ወእሠይሞ፡ መኰንነ፡ ውስተ፡ ሣልስት፡ አደ፡ መንግሥትየ፡ ወቦኡ፡ ኸሎሙ፡ ጠቢባነ፡ ባቢሎን፡ ወስዕኑ፡ አንብቦ፡ መጽሐፉ፡ ወፍካሬሁኒ፡ ኢነገርዎ፡ ለንጉሥ፤ ወደንገፁ፡ ብልጣሶር፡ ንጉሥ፡ ወፀልመ፡ ገጹ፡ ወደንገፁ፡ መገብቱ፡ ወቦአት፡ ንግሥት፡ ቤተ፡ መንግሥት። ወትቤ፡ ሕየው፡ አንተ፡ ኢይደንግዕከ፡ ልብከ፡ ወኢይጽለምከ፡ ገጽከ፡ ሀሎ፡ ፩ብእሴ፡ ውስተ፡ ምድረ፡ መንግሥትከ፡ ዘቦ፡ ላዕሌሁ፡ መንፈስ፡ እግዚአብሔር፡ ቅዱስ፡ ወበመዋዕለ፡ አቡከኒ፡ ተረክበ፡ ላዕሌሁ፡ ጥበብ፡ ወነገረ፡ ህልም፡ ወፍካሬሁ። ወሚሞ፡ ናቡከደነጾር፡ አቡከ፡ መልአከ፡ ለጠቢባን፡ ወለማዕራን፡ ወለሰብእ፡ ሰገል፡ ወለሰብእ፡ ሥራይ። እስመ፡ ፈ

F. 168r

(col. 1) ድፋደ፡ መንፈስ፡ ዘላዕሌሁ፡ ወጥበብ፡ ውስተ፡ ፍካሬ፡ ህልም፡ ወይንግር፡ ዘኅቡዕ፡ ወይፈትሕ፡ ዘዕሡር፡ ዝውእቱ፡ ዳንኤል፡ ወዘንጉሥ፡ ሰመየ፡ ስሞ፡ ብልጣሶር፡ ወይእዜኒ፡ ይጸውዕዎ፡ ወይንግርከ፡ ፍካሬሁ። ራእይ፡ ፭ራእይ፡ ፮፡ ወሶቤሃ፡ ቦኣ፡ ዳንኤል፡ ቅድመ፡ ንጉሥ፡ ወወይቤሎ፡ ንጉሥ፡ ለዳንኤል፡ አንተነ፡ ዳንኤል፡ ዘእምደቂቀ፡ ፂዋ፡ ይሁዳ፡ ዘአምጽኡከ፡ አቡየ፡ ንጉሥ፡ እምይሁዳ፡ ሰማዕኩ፡ በእንቲአከ፡ ከመ፡ መንፈስ፡ እግዚአብሔር፡ ቅዱስ፡ ላዕሌከ፡ ወጥበብ፡ ወምክር፡ ወፍካሬ፡ ፈድፋደ፡ ተረክበ፡ ላዕሌከ። ወይእዜኒ፡ ቦኡ፡ ቅድሜየ፡ ጠቢባን፡ ወሰብእ፡ ሰገል፡ ወሰብእ፡ ሥራይ፡ ወማዕምራን፡ ያንብቡ፡ ዘመጽሐፈ፡ ወያይድዑኒ፡ ፍካሬሁ፡ ወስዕኑ፡ አንብቦቶ፡ ወፍካሬሁኒ። ወሰማዕኩ፡ አነ፡ በእንቲአከ፡ ከመ፡ ትክል፡ ፈክሮ፡ ወይእዜኒ፡ እመ፡ ክህልከ፡ አንብቦቶ፡ ለዝመጽሐፍ፡ ወአይዳዕከኒ፡ ፍካሬሁ፡ ሜላተ፡ አለብሰከ፡ ወሰዓንቀከ፡ ባዝግና፡ ወቃማ፡ ወርቅ፡ ውስተ፡ ክሳድከ፡ ወትኳንን፡ ሣልስተ፡ መንግሥትየ። ወይቤ፡ ዳንኤል፡ ቅድመ፡ ንጉሥ፡ ሀብትከኒ፡ ለከ፡ ይኩንከ፡ ወፍተ፡ መንግሥትከኒ፡ ሀብ፡ ለባዕድ፡ ወአነ፡ አንብቦ፡ ለመጽሐፍ፡

ወእነግረከ፡ ፍካሬሁኒ፡ አንጉሥ፡ እግዚአብሔር፡ ልዑል፡ ወሀብ፡ መንግሥተ፡ ወክብረ፡ ወዕባየ፡ ወግርማ፡ ለናቡከደነጾር፡ አቡከ፡ ወእምዕባዩ፡ ዘወሀብ፡ ኩሉ፡ አሕዛብ፡ ምድር፡ ወበሐውርተ፡ ወሕዝብ፡ ይርዕዱ፡ እምኔሁ፡ ወይፈርሁ፡ እምገዱ፡ ዘፈቀደ፡ ይቀትል፡ ወዘፈቀደ፡ ይቀሥፍ፡ ወዘፈቀደ፡ ያክብር፡ ወዘፈቀደ፡ ያጋሥር፡ ወአመ፡ አዕባየ፡ ልቦ፡ ወአጽንዓኅ

(col. 2) ፍሶ፡ ከመ፡ ይትዓበይ፡ ወድቀ፡ እምዕባየ፡ መንግሥቱ፡ ወጋሥረ፡ እምስብሩ፡ ወሰደዶ፡ እምስብእ፡ ወልበ፡ አርዌ፡ ተውህቦ፡ ወነበረ፡ ምስለ፡ ሐለስትዮታተ፡ ወተርእየ፡ ሣዕረ፡ ከመ፡ ላህም፡ ወተሣረየ፡ ነፍስቱ፡ እምጠለ፡ ሰማይ፡ እስከ፡ አእመረ፡ ከመ፡ ልዑል፡ ይኳንን፡ መንግሥተ፡ ዕጓለ፡ እመሕያው፡ ወለዘፈቀደ፡ ይሁብ፡ ወአንተኒ፡ ወልዱ፡ ብልጣሶር፡ ኢያትሐትከ፡ ልበከ፡ ቅድመ፡ ንጉሥ፡ እግዚአብሔር፡ ወዘንተሰ፡ ኩሉ፡ ኢያእመርከ፡ ወተዓበይከ፡ ላዕለ፡ እግዚአብሔር፡ አምላክ፡ ሰማይ፡ ወንዋየ፡ ቤቱሂ፡ አምጸእከ፡ ቅድሜከ፡ ወአንተ፡ ወመግብትከ፡ ወአንስቲያከ፡ ወዕቁባቲከ፡ ሰተይክሙ፡ በወርቁ፡ ወአማልክቲክሙ፡ ዘወርቅ፡ ወብሩር፡ ወብርት፡ ወሐፂን፡ ወዕፀው፡ እለ፡ ኢይሰምዑ፡ ወኢይሬእየ፡ ወኢየሐውሩ፡ አእኩትክሙ፡ ወለእግዚአብሔርሰ፡ ዘውስተ፡ እደሁ፡ መንፈስከ፡ ወኩሉ፡ ፍናዊከ፡ ኢያእኩትከ፡ ወበእንተዝ፡ ተፈነወ፡ እምኅቤሁ፡ አጽባዕተ፡ እድ፡ ወዝመጽሐፍ፡ ዘተአዘዘ፡ ሚኔ፡ ቴቄል፡ ፋሬስ፡ ወከመዝ፡ ፍካሬሁኒ፡ ውእቱ፡ ማኔ፡ ብሂል፡ ሰፈራ፡ እግዚአብሔር፡ ለመንግሥትከ፡ ወሠለጣ፡ ቴቄልሂ፡ ደለዋ፡ በመዳልው፡ ወተረክበተ፡ ሕፅፅተ፡ ፋሬስኒ፡ ተሥዕረት፡ መንግሥትከ፡ ወተውህበት፡ ለሚዶን፡ ወለፋርስ፡ ወአዘዘ፡ ብልጣሶር፡ ያልብስዎ፡ ሜላተ፡ ለዳንኤል፡ ወያዕንቅዎ፡ ቃማ፡ ወርቅ፡ ውስተ፡ ክሳዱ፡ ወይሰብኩ፡ ሎቱ፡ ከመ፡ ይኩን፡ ውስተ፡ ሣልስተ፡ እደ፡ መንግሥቱ፡ ወአልበስዎ፡ ሜላተ፡ ወአዕንቅዎ፡ ባዝግና፡ ወርቅ፡ ውስተ፡ ከሣዱ፡ ወሰበኩ፡ ሎቱ፡ ከመ፡ ይኩን፡ ውስተ፡ ሣልስተ፡ እደ፡ መንግሥቱ፡ ወበይእቲ፡ ሌሊ

(col. 3) ት፡ ሞተ፡ ንጉሠ፡ ከላደዎን{ው}ዳርዮስ፡ ሜዶናዊ፡ ነግሠ፡ ህያንቴሁ፡ እንዘ፡ ስሳ፡ ወጀከረምቱ፡ ወአደሞ፡ በቅድሚሁ፡ ለዳርዮስ፡ ወሜመ፡ በውስተ፡ መንግሥቱ፡ ፪ወ፳መሳፍንተ፡ ከመ፡ የሀልው፡ ውስተ፡ ኩሉ፡ መንግሥቱ፡ ወእለ፡ ይትሌዓሉ፡ እምኔሆሙ፡ ነገሥት፡ ፫ወ፩እምኔሆሙ፡ ዳንኤል፡ ከመ፡ ኅቤሆሙ፡ ያግብኡ፡ ናሥታ፡ ለ፫ነገሥት፡ ወኢያጽሐብዎ፡ ለንጉሥ፡ ወኢበምንትኒ፡ ወዳንኤል፡ የዓቢ፡ እምኔሆሙ፡ እስመ፡ ፈድፈደ፡ መንፈስ፡ ዘላዕሌሁ፡ ወሜሞ፡ ንጉሥ፡ ላዕለ፡ ኩሉ፡ መንግሥቱ፡ ወጋሥሁ፡ ሎቱ፡ ምክንያተ፡ ለዳንኤል፡ መግብት፡ ወመኳንንት፡ ወኢረከቡ፡ ምክንያተ፡ ሎቱ፡ ወኢምንተኒ፡ ጌጋየ፡ እስመ፡ ምእመን፡ ውእቱ፡ ወይቤሉ፡ መግብት፡ ኢንረክብ፡ ሎቱ፡ ምክንያተ፡ ለዳንኤል፡ ዘእንበለ፡ በሕገ፡ አምላኩ፡ ወእምዝ፡ ተጋብኡ፡ መግብት፡ ወመኳንንት፡ ኅበ፡ ንጉሥ፡ ወይቤልዎ፡ ሕየው፡ ንጉሥ፡ ለዓለም፡ ወተማከሩ፡ መላእክት፡ ወመሳፍንት፡ ወመግብት፡ ኩሎሙ፡ እለ፡ ውስተ፡ መንግሥትከ፡ ወአደሙ፡ ዕድሜ፡ ከመ፡ አልቦ፡ ዘይሰዕል፡ ኅበ፡ ኩሉ፡ አማልክት፡ ወሰብእ፡ እስከ፡ ሠላስ፡ ዕለት፡ ዘእንበለ፡ ኅቤከ፡ ኦንጉሥ፡ ወለዘዓባየ፡ ቃለከ፡ ይደልዎ፡ ኩነኔ፡ ወእመ፡ አኮ፡ ይደይዎ፡ ውስተ፡ ዓዘቅተ፡ አናብስት፡ ይእዜኒ፡ አዝዝ፡ ዕድሜ፡ ኦንጉሥ፡ ይጸሐፍ፡ ከመ፡ ኢይዕባየ፡ ሥርዓተ፡ ፋርስ፡ ወሜዶን፡ ወሶቤሃ፡ አዘዘ፡ ዳርዮስ፡ ይጽሐፉ፡ ዘንተ፡ ሥርዓተ፡ ወአእሚሮ፡ ዳንኤል፡ ከመ፡ ተአዘዘ፡ ዝንቱ፡ ሥርዓት፡ ቦአ፡ ቤቶ፡ ወአርጋው፡ መሳክወ፡ ዘጽርሑ፡ አንጸረ፡ ኢየሩሳሌም፡ ወጊዜ፡ ፫ሰዓት፡ ዘዕለት፡ ሰገደ፡ ወጸለየ፡ ወተጋነየ፡

F. 168v

(col. 1) ቅድመ፡ አምላኩ፡ በአይ፡ ግብር፡ ዘልፈ፡ ያስተሐይጽዎ፡ ወያስተዋድይዎ፡ እሙንቱ፡ ዕደው፡ ወረከብዎ፡ ለዳንኤል፡ እንዘ፡ ያስተበቁሥዎ፡ ለአምላክ፡ ወይጼሊ፡ ወሐሩ፡ ወይቤልዎ፡ ለንጉሥ፡ ኦንጉሥ፡ አኮኑ፡ አደምከ፡ ከመ፡ ኢይስኦል፡ ኩሉ፡ ሰብእ፡ እስከ፡ ሠላስ፡ ዕለት፡ ዘእንበለ፡ ኅቤከ፡ ንጉሥ፡ እመቦ፡ ዘተረክበ፡ ይደይዎ፡ ውስተ፡ ግብር፡ አናብስት፡ ወይቤ፡ ንጉሥ፡ እሙን፡ ዝ፡ ነገር፡ ወኢይቅሥት፡ ቃሎሙ፡ ለፋርስ፡ ወለሚዶን፡ ወአውሥኡ፡ ወይቤሉ፡ ቅድመ፡ ንጉሥ፡ ወናሁ፡ ዳንኤል፡ እምደቂቀ፡ ጼዋ፡ ዘይሁዳ፡

ዘዓበየ፡ ትእዛዘክ፡ ወጊዜ፡ ቼሰዓት፡ ዘዕለት፡ ሰአለ፡ ኀበ፡ አምላኩ፡ ስዕለቶ፡ ወሰሚያ፡ ንጉሥ፡ ዘንተ፡ ነገረ፡ ተከዘ፡ ጥቀ፡ ወተባዓሰ፡ ያድኅኖ፡ ለዳንኤል፡ ወእስከ፡ ሰርከ፡ ፈቀደ፡ ያድኅኖ፡ ወስዕነ፡ ራእይ፡ ወይቤልዎ፡ እሙንቱ፡ ዕደው፡ ሶቤሃ፡ ለንጉሥ፡ አእምር፡ ንጉሥ፡ ከመ፡ ዕድሜ፡ ዘዓደሙ፡ ፋርስ፡ ወሜዶን፡ ወሠርዑ፡ ዓበየ፡ ወኢሰአለከ፡ ወሶቤሃ፡ አዘዘ፡ ንጉሥ፡ ይጸውዕዎ፡ ለዳንኤል፡ ወያምጽእዎ፡ ለዳንኤል፡ ወይደይዎ፡ ውስተ፡ ግበ፡ አናብስት፡ ወይቤሎ፡ ንጉሥ፡ ለዳንኤል፡ አምላክክ፡ ዘኪያሁ፡ ተወከልከ፡ ዘልፈ፡ ለያድኅንከ፡ አምጽኡ፡ እብነ፡ ወከደነ፡ ውስተ፡ አፈ፡ ግብ፡ ወሐተመ፡ ንጉሥ፡ በህልቀተ፡ መገብቱ፡ ከመ፡ አልቦ፡ ዘይትመነገን፡ ላዕለ፡ ዳንኤል፡ ወአተወ፡ ንጉሥ፡ ቤቶ፡ ወኖመ፡ ዘእንበለ፡ ይደረር፡ ወኢያብኡ፡ ሎቱ፡ ዘይበልዕ፡ ወዓበዮ፡ ንዋም፡ ወዓፀወ፡ እግዚአብሔር፡ አፋሆሙ፡ ለአናብስት፡ ወኢሠሐጥዎ፡ ለዳንኤል፡ ወእምዝ፡ ጌሠ፡ ንጉሥ፡ በጽባሕ፡ ቅድመ፡ ጎሕ፡ ወኖጸ፡ ኀበ፡ ግበ፡ አናብስት፡ ወበጺሑ፡ ኀበ፡ ግብ፡ ከልክ፡ በዓቢይ፡ ቃል፡ ወይቤ፡ ዳንኤል፡ ዳ

(col. 2) ንኤል፡ ገብረ፡ እግዚአብሔር፡ ጌር፡ ወሕያው፡ አምላክክ፡ ዘኪያሁ፡ ታመልከ፡ ዘልፈ፡ ክህለኑ፡ አድኅኖተከ፡ እምአፈ፡ አናብስት፡ ወይቤሎ፡ ዳንኤል፡ ለንጉሥ፡ ንጉሥ፤ ለዓለም፡ ሕየው፡ አምላኪያ፡ ፈነወ፡ መልአኮ፡ ወፈጸመ፡ አፈ፡ አናብስት፡ ወኢክህሉኒ፡ እስመ፡ ተረክበ፡ ላዕሌየ፡ ጽድቅ፡ በቅድሜሁ፡ ወበቅድሜከኒ፡ ንጉሥ፡ ኢገበርኩ፡ እኩየ፡ ወሶቤሃ፡ ተፈሥሐ፡ ንጉሥ፡ ጥቀ፡ በእንቲአሁ፡ ወአዘዘ፡ ያውዕዕዎ፡ ለዳንኤል፡ እምግበ፡ አናብስት፡ ወወፅአ፡ ዳንኤል፡ እምግብ፡ ወኢተነስየ፡ ምንተኒ፡ ወኢተረክበ፡ ጎሡም፡ ላዕሌሁ፡ እስመ፡ ተአመነ፡ በአምላኩ፡ ወይቤ፡ ንጉሥ፡ አምጽእዎሙ፡ ለእሙንቱ፡ ዕደው፡ እለ፡ አስተዋደይዎ፡ ለዳንኤል፡ ወውድይዎሙ፡ ውስተ፡ ዓዘቅተ፡ አናብስት፡ ለእሙንቱኒ፡ ወደቂቆሙኒ፡ ወአንስቲያሆሙ፡ ወዘእንበለ፡ ይብጽሑ፡ ምድረ፡ ግብ፡ አኀዝዎሙ፡ አናብስት፡ ወቀጥቀጥዎሙ፡ ኩሎ፡ አዕፅዎቲሆሙ፡ ወእምዝ፡ ጸሐፈ፡ ዳርዮስ፡ ንጉሥ፡ ለኩሎ፡ አሕዛብ፡ ወሕዝብ፡ ወበሐውርት፡ ወለኩሎሙ፡ እለ፡ ይነብሩ፡ ውስተ፡ ኩሎ፡ ምድር፡ ሰላምአ፡ ይብዛኀክሙ፡ እምቅድመ፡ ገጽየ፡ ወአዘዘኩ፡ ሥርዓተ፡ ለኩሎ፡ መኳንንት፡ ዘውስተ፡ መንግሥትየ፡ ከመ፡ ይፍርሁ፡ ወይርዓዱ፡ እምቅድመ፡ ገጹ፡ ለአምላክ፡ ዳንኤል፡ እስመ፡ ውእቱ፡ አምላክ፡ ሕያው፡ ዘይሄሉ፡ ለዓለም፡ ዘኢይማስን፡ መንግሥቱ፡ ወምኩናኑ፡ ለዝሉፋ፡ ወያድኅንሂ፡ ወይረድእሂ፡ ወይገብር፡ ትእምርተ፡ ወመንክረ፡ በሰማይ፡ ወበምድር፡ ዘአድኃኖ፡ ለዳንኤል፡ እምአፈ፡ አናብስት፡ ወዓብየ፡ ዳንኤል፡ በመንግሥተ፡ ዳርዮስ፡ ወበመንግሥተ፡ ቂርስ፡ ፋርሳዊ፡ ራእይ፡ ፳፭፡ ፳፭፡ ፯

(col. 3) ራእየ፡ በቀዳሚ፡ ዓመተ፡ መንግሥቱ፡ ለብልጣሶር፡ ንጉሠ፡ ባቢሎን፡ ወሐለመ፡ ዳንኤል፡ ሕልመ፡ ወርእየ፡ ርእሱ፡ በውስተ፡ ምስካቡ፡ ወጸሐፈ፡ ዳንኤል፡ ሕልሞ፡ ወይቤ፡ አነ፡ ዳንኤል፡ ሐለምኩ፡ ወርኢኩ፡ በሌሊት፡ ፬ነፋሳተ፡ ሰማይ፡ ነፍሑ፡ ውስተ፡ ባሕር፡ ዓቢይ፡ ወዐርጉ፡ አራዊት፡ ፬ዓበይት፡ እምባሕር፡ ኀቡረ፡ ወቀዳማዊት፡ ከመ፡ አንበሳዊት፡ ወባቲ፡ ክንፍ፡ ወክነፊሃ፡ ከመ፡ ዘንስር፡ ወርኢክዋ፡ እስከ፡ ተመልሐ፡ ክነፊሃ፡ ወተንሥኦት፡ ወቆመት፡ በእግረ፡ ሰብእ፡ ዲበ፡ ምድር፡ ወልበ፡ ሰብእ፡ ተውሀበ፡ ላቲ፡ ወመጽኦት፡ ካልእት፡ አርዌ፡ ዘትመስል፡ ድበ፡ ወቆመት፡ ፩ገጸ፡ ወ፩ገጸ፡ ወ፫ዓፅመ፡ ገበዋት፡ ውስተ፡ አፋሃማዕከለ፡ አስናኒሃ፡ ወከመዝ፡ እቤላ፡ ተንሥኢ፡ ወብልዒ፡ ሥጋ፡ ብዙኃ፡ ወእምድኅረ፡ ዝንቱ፡ ርኢኩ፡ ካልአ፡ አርዌ፡ ግርምተ፡ ከመ፡ ነምር፡ ወላዕሌሃ፡ ፬ክንፈሥ፡ ወ፬አርእስቲሃ፡ ለአርዌናሃ፡ ወተውሀበ፡ ላቲ፡ መባሕት፡ ወድኅፊሁ፡ ሎቱ፡ ርኢኩ፡ በራእየ፡ ሌሊት፡ ራብዓ፡ አርዌ፡ ግሩመ፡ ወመደንግ፡ ወኃያለ፡ ጥቀ፡ ወስነኒሁ፡ ዘሐፂን፡ ወጽፈሪሁ፡ ዘኃፂን፡ ይበልዕ፡ ወየኃርፅ፡ ወዘተርፈ፡ ይከይድ፡ በእግሩ፡ ወውእቱ፡ አርዌ፡ የዓቢ፡ እምኩሎ፡ አራዊት፡ ዘቅድሜሁ፡ ፲አቅርንቲሁ፡ ወነጸርኩ፡ አቅርንቲሁ፡ ወናሁ፡ ካልአ፡ ቀርን፡ ንዑስ፡ በማዕከሎሙ፡ በቈለ፡ ወ፫አቅርንቲሁ፡ እለ፡ እምቅድሜሁ፡ ተመልሑ፡ እምቅድመ፡ ገጹ፡ ወውስቱቱ፡ አዕይንት፡ ከመ፡ አዕይንተ፡ ሰብእ፡ ውስተ፡ ውእቱ፡ ቀርን፡ ንዑስ፡ ወአፋሁ፡ ይነብብ፡ ዓበይተ፡ ወርኢኩ፡ እስከ፡ አንበሩ፡ መናብርተ፡ ወነበረ፡ ብሉየ፡ መዋዕል፡ ወልብሱ፡ ፀዓዳ፡ ከመ፡ በረድ፡ ወሥዕርተ፡ ርእሱ፡ ከመ፡ ፀምር፡ ንጹሕ፡ ወመንበሩሂ፡ እሳት፡ ዘ

F. 169r

(col. 1) ይነድድ። ወሠረገላሁኒ፡ አፍሐም፡ ዘያንበለብል፡ ወፈለገ፡ እሳት፡ ይውኅዝ፡ ቅድሜሁ፡ አዕላፈ፡ አዕላፋት፡ ይትለአክዎ፡ ወትእልፊተ፡ አዕላፋት፡ እለ፡ ይቀውሙ፡ ቅድሜሁ፡ ወነበረ፡ ዓውደ። ወከሠተ፡ መጻሕፍተ። ወርኢኩ፡ ሶቤሃ፡ እምቃለ፡ ነገሩ፡ ዓቢይ፡ ዘይነብብ፡ ዝኩ፡ ቀርን፡ እስከ፡ ተአተተ፡ ወርኢኩ፡ እስከ፡ ተአተተ፡ ወተቀትለ፡ ዝኩሂ፡ አርዌ፡ ወጠፍአ፡ ወወሀቡ፡ ሥጋሁ፡ ያውዕይዎ፡ በእሳት። ወፈለሰ፡ ሥልጣኖሙ፡ ለእለ፡ ተርፉ፡ አራዊት፡ ወተውሀበ፡ ሎሙ፡ ነዋህ፡ ሕይወት፡ እስከ፡ ዕድሜሆሙ። ወርኢኩ፡ በራዕየ፡ ሌሊት። ወናሁ፡ መጽአ፡ ዓቢይ፡ በደመና፡ ሰማይ፡ ከመ፡ ወልደ፡ ዕጓለ፡ እመሕያው፡ ወበጽሐ፡ ኀበ፡ ብሉየ፡ መዋዕል፡ ወተውሀበ፡ ሎቱ፡ ምክኖን፡ ወክብር፡ ወመንግሥት፡ ወኸሎሙ፡ አሕዛብ፡ ወነገድ፡ ወበሐውርት፡ ይትቀነዩ፡ ሎቱ፡ ወምክኖኑኒ፡ ምክኖን፡ ዘለዓለም፡ ዘኢየሁዳቅ፡ ወመንግሥቱሂ፡ ዘኢያማስን። ወርዕደኒ፡ መንፈስየ፡ አነ፡ ዳንኤል፡ ወደንገፀኒ፡ ልብየ፡ እምራእየ፡ ርእስየ፡ ወሐርኩ፡ ወተጠየቅዎ፡ ለ፩እምእለ፡ ይቀውሙ፡ ወነገረኒ፡ ወአይድዓኒ፡ ፍካሬሁ፡ ጥዩቀ፡ ወጠየቁ፡ ኸሎ፡ ነገሮ። ወይቤለኒ፡ እሉ፡ ፱አራዊት፡ ዓበይት፡ ዘርኢኩ፡ ፱ነገሥት፡ እሙንቱ፡ ወይትነሥኡ፡ እምድር፡ ወዓዲ፡ ይትአተቱ፡ ወይገብእ፡ መንግሥት፡ ለቅዱሳን፡ ልዑል። ወይነብርዋ፡ ለዓለመ፡ ዓለም። ራእይ፡ ወተጠየቅዎ፡ በእንተ፡ ራብዓይ፡ አርዌ፡ እስመ፡ ነኪር፡ ውእቱ፡ እምክሉ፡ አራዊት፡ ወግሩም፡ ውእቱ፡ ጥቀ፡ ወስነኒሁ፡ ዘኃፂን፡ ወጽፈሪሁ፡ ዘብርት፡ ይበልዕ፡ ወየሐርፅሂ፡ ወዘተርፈ፡ ይከይድ፡ በእግሩ፡ ወበአንተ፡ ፲ሂ፡ አቅርንቲሁ፡ ዘውስተ፡ ርእሱ፡ ወዝኩሂ፡ ካልዕ፡ ቀርን፡ ዘበቄለ፡ ማዕከሎሙ፡ ወመልዕልቱሆሙ፡ ለ፫እም

(col. 2) እልክቱ፡ ፲እለ፡ እምቅድሜሁ፡ አቅርንት፡ ዝኩ፡ ዘቦ፡ አዕይንት፡ ወአፋሁ፡ ይነብብ፡ ዓቢያተ፡ ወርእሱሂ፡ የዓቢ፡ እምቢጽ፡ ርኢክዎ፡ ለውእቱ፡ ቀርን፡ ይትቃተሎሙ፡ ለቅዱሳን፡ ወሞአሙ፡ እስከ፡ መጽአ፡ ብሉየ፡ መዋዕል፡ ወፈትሐ፡ ሎሙ፡ ለቅዱሳን፡ ልዑል፡ ወበጽሐ፡ ዕድሜ፡ ወአጽንዓ፡ መንግሥቶሙ፡ ለቅዱሳን። ወይቤለኒ፡ ዝንቱ፡ አርዌ፡ ራብዕ፡ ራብዕት፡ መንግሥት። ወትትነሣዕ፡ ዲበ፡ ምድር፡ ይእቲ፡ እንተ፡ ተዓቢ፡ እምክሉን፡ መንግሥታተ፡ ምድር። ወትበልዕ፡ ኸሎ፡ መንግሥታተ፡ ምድር፡ ወይከይዳ፡ ወይቀጠቅጣ፡ ወ፲አቅርንት፡ ፲ነገሥታት፡ እሙንቱ፡ ዘይትነሥኡ፡ ዲበ፡ ምድር። ወእምድኅሬሆሙ፡ ይትነሣእ፡ ካልእ፡ ንጉሥ፡ ወየአትቶሙ፡ ለእኩያን፡ ፫እለ፡ እምቅድሜሁ፡ ወያሥሮሙ፡ ለ፲ነገሥት፡ ወይነብብ፡ በነገረ፡ ልዑል፡ ያስሕቶሙ። ወያአትቶሙ፡ ለቅዱሳን፡ ልዑል፡ ይሔሊ፡ ወይወወልጥ፡ መዋዕለ፡ ወሕገ፡ ወይትወሀብ፡ ሎቱ፡ እስከ፡ ዕድሜሁ፡ ውስተ፡ እዴሁ፡ እስከ፡ ዓመታት፡ ወዓመት፡ ወመንፈቀ፡ ዓመት፡ ወይነብር፡ ዓውደ፡ ወይሥዕሮ፡ ለመልአክ፡ ከመ፡ ኢያማስን፡ ለግመራ፡ መንግሥተ፡ ወመክኖን። ዕበየ፡ መንግሥት፡ ዘመትሕተ፡ ሰማይ፡ ይትወሀብ፡ ለሕዝብ፡ ቅዱሳን፡ ልዑል፡ ወመንግሥቱሂ፡ መንግሥት፡ ዘለዓለመ፡ ዓለም። ወኸሎ፡ መኳንንት፡ ይትቀነዩ፡ ሎቱ፡ ወይትኤዘዘ፡ ሎቱ፡ እስከ፡ ጊዜ፡ ነገሮ። ወአሜሃ፡ ማኅለቅተ፡ ሕዝብ፡ አነ፡ ዳንኤል፡ ሕሊናየ፡ ተሀውከኒ፡ ጥቀ፡ በሕቁ፡ ወተወለወ፡ ራእይየ፡ ወዓቀብኩ፡ ነገሮ፡ ውስተ፡ ልብየ። ወአመ፡ ፲ዓመተ፡ መንግሥቱ፡ ለብልጣሶር፡ ንጉሥ፡ ራእይ፡ አስተርአየኒ፡ ሊተ፡ ወአነ፡ ዳንኤል፡ ርኢኩ፡ እምድኅረ፡ አስተርአየኒ፡ ዘቀዳሚ፡ በራእይ፡ እንዘ፡ ሀሎኩ፡ ውስተ፡ ሐቅለ፡ ሱ

(col. 3) ሳ፡ ዘባሪ፡ እንተ፡ ዘብሔረ፡ ዔላም፡ ወርኢኩ፡ በራእይ፡ ወሀለውኩ፡ ውስተ፡ ዑባል፡ ወአንሣእኩ፡ ዓይነየ፡ ወርኢኩ። ወናሁ፡ መጽአ፡ ፩በሐከ፡ ወቆመ፡ ቅድመ፡ ዑባል፡ ወሎቱ፡ ፪አቅርንት፡ ነዋኃት፡ ወ፩ይነውህ፡ እምካልዑ፡ ወዘይነውህ፡ ድኅሬሁ፡ በቄለ፡ ወርኢክዎ፡ ለውእቱ፡ በሐከ፡ ይወግዕ፡ በአቅርንቲሁ፡ ለመንገል፡ ባሕር፡ ወሰሜን፡ ወደቡብ፡ ወኢይቀውም፡ ኸሎ፡ አራዊት፡ ቅድሜሁ፡ ወአልቦ፡ ዘያመሥጥ፡ ወዘይድኅን፡ እምእዴሁ፡ ወገብረ፡ ዘከመ፡ ፈቀደ፡ ወዓብየ። ወአነ፡ ዳንኤል፡ ሀሎኩ፡ ውስተ፡ ሱሳ፡ ወእንዘ፡ እሔሊ፡ ወእጠይቅ፡ ዘንተ። ወናሁ፡ መጽአ፡ ዳቤላ፡ ዘጠሊ፡ እምደቡብ፡ ላዕለ፡ ኸሎ፡ ገጸ፡ ምድር፡ ወአልቦ፡ ዘለከፋ፡ ለምድር፡ ወቦ፡ ቀርን፡ ማዕከለ፡ አቅርንቲሁ፡ ለውእቱ፡ ዳቤላ፡ ወሐረ፡ ኀበ፡ ዝኩ፡

በሐክ፡ ዘቦ፡ አቅርንት፡ ዘርኢኩ፡ ይቀውም፡ ቅድመ፡ ዑባል፡ ወሮጸ፡ ኅቤሁ፡ በመዓተ፡ ኃይሉ፡ ወርኢክዎ፡ በጽሐ፡ ኅበ፡ ዝኩ፡ በሐክ፡ ወአብደ፡ ወተዓርወየ፡ ላዕሌሁ፡ ወአውደቆ፡ ለዝኩ፡ በሐክ፡ ወቀጥቀጠ፡ ክልኤሆን፡ አቅርንቲሁ፡ ወአልቦ፡ ኃይል፡ ለዝኩ፡ በሐክ፡ ከመ፡ ይቁም፡ ቅድሜሁ፡ ወነጽሐ፡ ዲቦ፡ ምድር፡ ውእቱ፡ ደቤላ፡ ወኬዶ፡ ወአልቦ፡ ዘአድኃኖ፡ እምእዴሁ፡ ለውእቱ፡ በሐክ፡ ወዝኩ፡ ደቤላ፡ ዘጠሊ፡ ዓብየ፡ ጥቀ፡ ወሶቦ፡ ጸንዓ፡ ተሰብረ፡ ለዝኩ፡ በሐክ፡ ቀርኖ፡ ዓቢየ፡ ወዓዲ፡ ወፅኡ፡ ፱አቅርንት፡ መትሕቴሃ፡ ለ፱ነፋሳተ፡ ሰማይ፡ ወእምውስተ፡ ፩እምኔሆሙ፡ በቈለ፡ ፩ቀርን፡ ንዑስ፡ ጽኑዕ፡ ወዓብየ፡ ጥቀ፡ መንገለ፡ ሰሜን፡ ወበጽባሕ፡ ወበጽሐ፡ በኃይል፡ ዓቢይ፡ ወእስከ፡ ኃይለ፡ ሰማይ፡ ወወድቀ፡ ውስተ፡ ምድር፡ እምኃይለ፡ ሰማይ፡ ወእምነ፡ ከዋክብተ፡ ሰማ

F. 169v

(col. 1) ይ፡ ወኬዶን፡ ወእስከ፡ ማዕከለ፡ ከመ፡ ያድኅን፡ ዪዋሁ፡ ሰርዌ፡ ዓብየ፡ ወእምኔሁ፡ ተህውኩ፡ ዪዋሁ፡ ወባሕቱ፡ ይትህወኩ፡ መሣውዕት፡ ዘልፈ፡ ወኮነ፡ ወተሠልጠ፡ ወማሰነ፡ መቅደስ፡ ወተሠብ፡ ኃይል፡ ወትረ፡ ላዕለ፡ መሥዋዕተ፡ ኃጥአን፡ ኃጢአት፡ ወተገደፈት፡ ጽድቀ፡ ውስተ፡ ምድር፡ ወገብረ፡ ወተሠልጠ፡ ወሰማዕኩ፡ ፩ቅዱስ፡ መልአክ፡ ይነግር፤ ወይቤ፡ በፊልሙንዉ፡ ይነብብ፡ እስከ፡ ማእከኑ፡ ይቀውም፡ ራእየ፡ ነቢያት፡ ወምሥዋዕ፡ እንተ፡ ተነስተት፡ ወኃጢአተ፡ እንተ፡ አማሰነት፡ ተሠህበት፡ መቅደስ፡ ወኃይላ፡ ተከይደ፡ ወይቤሎ፡ እስከ፡ ሰርክ፡ ወነግህ፡ ወ፳ወ፻፻መዋዕል፡ ወይነጽሕ፡ መቅደስ፡ ወእምዝ፡ ሶቦ፡ ርኢኩ፡ አነ፡ ዳንኤል፡ ዘራእየ፡ ኃሠሥኩ፡ ጠይቆቶ፡ ወመጽአ፡ ወቆመ፡ ቅድሜየ፡ ከመ፡ ራእየ፡ ብእሲ፡ ወሰማዕኩ፡ ቃለ፡ ብእሲ፡ በማዕከለ፡ ዑባል፡ ወጸውዓ፡ ወይቤ፡ ገብርኤል፡ ገብርኤል፡ አለብዎ፡ ዝኩ፡ ራእየ፡ መጽአ፡ ወቆመ፡ ጥቃ፡ ኅበ፡ እቀውም፡ አነ፡ ወመጺአ፡ ደንገዕኩ፡ ወወደቁ፡ በገጽየ፡ ወይቤለኒ፡ ለበውከኑ፡ ወልደ፡ ዕንለ፡ እመሕያው፡ እስመ፡ ዓዲ፡ ኢሐልቀ፡ ዕድሜሁ፡ ለራእይ፡ ወሶቦ፡ ነበበኒ፡ ደንገዕኩ፡ ወወደቁ፡ በገጽየ፡ ውስተ፡ ምድር፡ ወአኅዘኒ፡ ወአንሥአኒ፡ ወዓቀመኒ፡ በአግርየ፡ ወይቤለኒ፡ ናሁ፡ አነ፡ እንግረከ፡ ዘይከውን፡ በደኃሪ፡ መዋዕል፡ መቅሠፍት፡ ዓቢይ፡ እስመ፡ ዓዲ፡ ጊዜ፡ ኅልቀት፡ ዕድሜሁ፡ ለራእይ፡ ኢበጽሐ፡ በሐክ፡ ዘርኢኩ፡ ዘቦ፡ አቅርንት፡ ንጉሠ፡ ፋርስ፡ ወሜዶን፡ ወዳቤላኒ፡ ዘጠሊ፡ ንጉሠ፡ ኤሊ፡ ዋን፡ ውእቱ፡ ወቀርኑኒ፡ ዓቢይ፡ ዘማዕከለ፡ አዕይንቲሁ፡ ውእቱ፡ ንጉሥ፡ ቀዳማዊ፡ ወዘተቀጥቀጠ፡ ኅበ፡ ቆመ፡ ፱አቅርንት፡ ታሕቴሁ፡ ዘበቄ

(col. 2) ሉ፡ ፱ነገሥት፡ ይትነሥኡ፡ ወአኩ፡ በኃይሎሙ፡ ወበደኃሪታ፡ ለመንግሥቶሙ፡ ትትፌጸም፡ ኃጢአቶሙ፡ ወእምውስተ፡ ፩ኒ፡ እምኔሆሙ፡ ዘበቄለ፡ ቀርን፡ ጽኑዕ፡ ወይትነሣእ፡ ንጉሥ፡ ዘኢየሩሳሌም፡ ገጸ፡ ወኢየአምር፡ ምሳሌ፡ ወፅኑዕ፡ ኃይሉ፡ ወአኩ፡ በኃይሎ፡ ወዕዑባቲሁ፡ ዘያማስን፡ ያማሰን፡ ዕፁባተ፡ ወያረትዕ፡ ግብረ፡ ወይገብር፡ ኃጢአተ፡ ወያጠፍአሙ፡ ለጽኑዓን፡ ወለቅዱሳን፡ ሕዝብ፡ ወያረትዕ፡ አርዑተ፡ ክሳድ፡ ወትምይንት፡ ውስተ፡ እዴሁ፡ ወይትዔበይ፡ በልቡ፡ ወበጉህሉት፡ ያሐልቆሙ፡ ለብዙኃን፡ ወዲቦ፡ መልአክ፡ መላእክት፡ ይቀውም፡ ወዘእንበለ፡ እድ፡ ይትቀጠቀጥ፡ እድ፡ ወራእየ፡ ሰርክ፡ ወነግህ፡ ዘተብህለ፡ እሙን፡ ውእቱ፡ ወአንተ፡ ኅትሞ፡ ለዝ፡ ራእይ፡ እስመ፡ ለብዙኅ፡ መዋዕል፡ ወአነ፡ ዳንኤል፡ ደወይኩ፡ ወሰከብኩ፡ መዋዕል፡ ወተንሣእኩ፡ ወገበርኩ፡ ግብረ፡ ንጉሥ፡ ወአንከርኩ፡ ዘራእየ፡ ወአልቦ፡ ዘየአምሮ፡ ራእይ፡ ፯ራእይ፡ ፰በቀዳሚ፡ ዓመተ፡ መንግሥቱ፡ ለዳርዮስ፡ ወልደ፡ አሕሻዊሮስ፡ ዘእምዘርአ፡ ሜዶን፡ ዘነግሠ፡ መንግሥተ፡ ከላውዴዎን፡ በዓመት፡ ፩መንግሥቱ፡ አነ፡ ዳንኤል፡ አእመርኩ፡ እምውስተ፡ መጻሕፍት፡ ጉልቄ፡ ዓመታት፡ ዘኮነ፡ ቃለ፡ እግዚአብሔር፡ ኅበ፡ ኤርምያስ፡ ነቢይ፡ በዘይሜለጥ፡ ሙስናሃ፡ ለኢየሩሳሌም፡ ፸ዓመት፡ ወሜጥኩ፡ ገጽየ፡ ኅበ፡ እግዚአብሔር፡ አምላኪየ፡ ከመ፡ እኅሥሥ፡ ጸሎተ፡ ወሣህለ፡ በጸም፡ ወበሳቅ፡ ወበሐመድ፡ ወጸለይኩ፡ ኅበ፡ እግዚአብሔር፡ አምላኪየ፡ ወገነይኩ፡ ወይቤ፡ እግዚእ፡ አምላክ፡ ዓቢይ፡ ወስቡሕ፡ ዘተዓቅብ፡ ኪዳነክ፡ ወምሕረተክ፡ ለእለ፡ ያፈቅሩክ፡ ወለእለ፡ የዓቅቡ፡ ትእዛዘክ፡ ዓበስን፡ ወ

(col. 3) ዓመፅነ፡ ወጌገይነ፡ ወተዓሎነ፡ ወተግሳሥነ፡ እምትእዛዝክ፡ ወእምፍትሕክ፡ ወኢስማዕናሆሙ፡ ለነቢያት፡ አግብርቲክ፡ እለ፡ ነገርዎሙ፡ በስምክ፡ ለነገሥትነ፡ ወለመላእክቲነ፡ ወለመኢንንቲነ፡ ወለአበዊነ፡ ወለኩሉ፡ ሕዝበ፡ ምድር፡ ወለክ፡ እግዚአ፡ ጽድቅ፡ ወለነ፡ ኃፍረት፡ ለገጽነ፡ በዛቲ፡ ዕለት፡ ለሰብአ፡ ይሁዳ፡ ወለእለ፡ ይነብሩ፡ ኢየሩሳሌም፡ ወለኩሉ፡ እስራኤል፡ ለርሁቃን፡ ወለቅሩባን፤ በኩሉ፡ ምድር፡ ኀበ፡ ዘረውኮሙ፡ ህየ፡ በማዕሌቶሙ፡ ዘዓለውክ፡ እግዚአ፡ ለነ፡ ኃፍረት፡ ለገጽነ፡ ወለነገሥትነ፡ ወለመላእክቲነ፡ ወለአበዊነ፡ እለ፡ አበሱ፡ ለክ፡ እግዚአ፡ አምላክ፡ ሣህል፡ ወምሕረት፡ እስመ፡ ክህድነ፡ ወኢስማዕኑ፡ ቃለ፡ እግዚአብሔር፡ አምላክነ፡ ከመ፡ ንሑር፡ በሕጉ፡ ዘወሀበነ፡ በቅድመ፡ ገጽነ፡ በእደ፡ አግብርቲሁ፡ ነቢያት፡ ወኩሉ፡ እስራኤል፡ ዓለው፡ ሕዝክ፡ ወዓባዩ፡ ሰሚዓ፡ ቃለክ፡ ወመጽአ፡ መርገም፡ ላዕሌነ፡ ወመሐላ፡ ዘጽሑፍ፡ ውስተ፡ ኦሪተ፡ ሙሴ፡ ገብረ፡ እግዚአብሔር፡ እስመ፡ ዓበስነ፡ ሎቱ፡ ወዓቅመ፡ ቃሎ፡ ዘነበበ፡ [ባ]ላዕሌነ፡ ወዲበ፡ መኢንንቲነ፡ እለ፡ ኩነነ፡ ወአምጽአ፡ ላዕሌነ፡ እኪተ፡ ዓቢየ፡ ዘኢኮነ፡ ከማሁ፡ በኩሉ፡ መትሕተ፡ ሰማይ፡ ዘከመ፡ ኮነ፡ በኢየሩሳሌም፡ በከመ፡ ጽሑፍ፡ ውስተ፡ ሕገ፡ ኦሪተ፡ ሙሴ፡ ወኩሉ፡ ዝንቱ፡ እኩይ፡ በጽሕነ፡ ወኢተማሳላልነ፡ ለገጽ፡ እግዚአብሔር፡ አምላክነ፡ ከመ፡ ንትመየጥ፡ እምኃጢአትነ፡ ወከመ፡ ነህሊ፡ ኩሉ፡ ጽድቀክ፡ ወተግሀ፡ እግዚአብሔር፡ ወአምጽአ፡ ላዕሌነ፡ መቀሠፍተ፡ እስመ፡ ጻድቅ፡ እግዚአብሔር፡ አምላክነ፡ በኩሉ፡ ግብሩ፡ ዘገብረ፡ ወኢስማዕነ፡ ቃሎ፡ ወይእዜሂ፡ እግዚአ፡ አምላክነ፡ ዘአውዓ

F. 170r

(col. 1) እኮሙ፡ ለሕዝብክ፡ እምድረ፡ ግብጽ፡ በእድ፡ ጽንዕት፡ ወበመዝራዕትነ፡ ወገበርክ፡ ለክ፡ ስምዓ፡ እስክ፡ ዛቲ፡ ዕለት፡ ዓለስነ፡ ወዓመፅነ፡ ወጌገይነ፡ እግዚአ፡ ወበኩሉ፡ ምሕረትክ፡ ሚጥ፡ መዓተክ፡ ወመቅሠፍተክ፡ እምኔነ፡ ወእምሀገርክ፡ ኢየሩሳሌም፡ ወደብረ፡ መቅደስክ፡ እስመ፡ አበስነ፡ ወጌገይነ፡ ወአበዊነ፡ በኢየሩሳሌም፡ ወኃብሩ፡ ወኃሥሩ፡ ሕዝብክ፡ በኩሉ፡ አድያሜነ፡ ወይእዜኒ፡ እግዚአ፡ አምላክነ፡ ስማዕ፡ ጸሎተ፡ ገብርክ፡ ስዕለቶ፡ ወአብርህ፡ ገጸክ፡ ላዕለ፡ መቅደስክ፡ ኢየሩሳሌም፡ ዘመዝበረ፡ በእንቲአክ፡ እግዚአ፡ አጽምዕ፡ እዝነክ፡ አምላኪየ፡ ወስማዕ፡ ስዕለትየ፡ ወክሥት፡ አዕይንቲክ፡ ወርኢ፡ ሙስናነ፡ ወዘሀገርክ፡ እንተ፡ ተሰምየ፡ ስምክ፡ ላዕሌሃ፡ ወአኮ፡ በጽድቅነ፡ ዘንጭሩ፡ ሣህለ፡ ቅድሚነ፡ ዳዕሙ፡ በምሕረትክ፡ ብዙኅ፡ እግዚአ፡ ስምዓነ፡ እግዚአ፡ ተሠሃለነ፡ እግዚአ፡ አጽምዓነ፡ እግዚአ፡ ግበር፡ ወኢታጐዓዲ፡ በእንቲአነ፡ እግዚአ፡ አምላክነ፡ እስመ፡ ተሰምየ፡ ስምክ፡ ላዕሌነ፡ ወላዕለ፡ ሀገርክ፡ ኢየሩሳሌም፡ ወዲበ፡ ሕዝብክ፡ ወእንዘ፡ እነግር፡ ወእጼሊ፡ ወእትአመን፡ ኃጢአትየ፡ ወኃጢአተ፡ ሕዝብየ፡ እስራኤል፡ ወእገድፍ፡ ሣህልየ፡ ቅድመ፡ እግዚአብሔር፡ አምላኪየ፡ በእንተ፡ ቤተ፡ መቅደሱ፡ ወደብረ፡ መቅደሱ፡ ለአምላኪየ፡ እንዘ፡ እነግር፡ ጸሎትየ፡ መጽአ፡ ብእሊ፡ ገብርኤል፡ ዘርኢኩ፡ ቀዲሙ፡ እንዘ፡ ይሠር፡ ወገሠሠኒ፡ በጊዜ፡ መሥዋዕተ፡ ሰርክ፡ ወአለበወኒ፡ ወተናገረ፡ ምምስሌየ፡ ወይቤለኒ፡ ገብርኤል፡ ዳንኤል፡ ዳንኤል፡ ወዓዕኩ፡ ወመዓዕኩ፡ አሰቡክ፡ ይእዜኒ፡ ጥበበ፡ ወበቀዳሚ፡ ጸሎትክ፡ ወፅአ፡ ቃል፡ ወመጻእኩ፡ አሰቡክ፡

(col. 2) ወእዜኑክ፡ ዘትፈቱ፡ እስመ፡ ብእሊ፡ ፍትወት፡ አንተ፡ ወሐልየ፡ ለነገርክ፡ ወለቡ፡ ዘርኢክ፡ ወስማዕ፡ እስክ፡ ፎሰንበታት፡ አድሞሙ፡ ለሕዝብክ፡ ወለሀገርክ፡ ቅድስት፡ ከመ፡ ትሔለጥ፡ ኃጢአት፡ ወይትሐተም፡ ጌጋይ፡ ወይደመሰሰ፡ አበሳ፡ ወትሠዓር፡ ዓመዓ፡ ወትመጽእ፡ ጽድቅ፡ እንተ፡ ለዓለም፡ ወይትዓተብ፡ ራእየ፡ ነቢያት፡ ወይትዓቀብ፡ ወይትቀባዕ፡ ቅዱስ፡ ቅዱሳን፡ ወተአመር፡ ወትሌቡ፡ እምፀዓተ፡ ቃሉ፡ ዘታወሥእ፡ ወትትሐነጽ፡ ኢየሩሳሌም፡ እስክ፡ ክርስቶስ፡ ንጉሥ፡ ጌሰንበታት፡ ወ፳ወ፪ይትመየጥ፡ ወይትሐነጽ፡ መርህባ፡ ወአረፍታ፡ ወይትከዐው፡ መዋዕል፡ እምድኅረ፡ ፳ወ፪፡ ሰንበታት፡ ይጠፍዕ፡ ቅብዓት፡ ወፍትሕ፡ አልቦ፡ ኀቤሁ፡ ወያማስን፡ ሀገረ፡ መቅደስ፡ ምስለ፡ ንጉሥ፡ ዘይመጽእ፡ ወይትሜተሩ፡ በአይኅ፡ እስክ፡ ለዝሎፋ፡ ይትረገዙ፡ ወይትቀተሉ፡ እስክ፡ ይጠፍዑ፡ ወይጸንዕ፡ ሕግ፡ ወሰንበታት፡ ወሥርዓታት፡

ወይሠዓር፡ መሥዋዕት፡ ወሞጻሕት፡ ወይማስን፡ መዓዝኒሁ፡ ለግሙራ፡ ወፍጡነ፡ ይማስን። ወይጸንዕ፡ ሥርዓቶሙ፡ ለብዙኃን፡ አሐተ፡ ሰንበተ፡ ወመንፈቀ፡ ሰንበት፡ ወይሠዓር፡ መሥዋዕት፡ ወሞጻሕት፡ ወይማስን፡ ርኽሶሙ፡ በውስተ፡ መቅደስ፡ ወእስከ፡ ማኅለቅተ፡ ዓመታት፡ ይትወሀብ፡ ዕድሜሁ፡ ለሙስና። ራእይ፡ ቿራእይ፡ ፱አመ፡ ፫ዓመተ፡ መንግሥቱ፡ ለቂሮስ፡ ንጉሠ፡ ፋርስ፡ ተከሥተ፡ ቃለ፡ እግዚአብሔር፡ ለዳንኤል፡ ዘተሰምየ፡ ስሙ፡ ብልጣሶር፡ ወእሙን፡ ነገር፡ ወኃይል፡ ዓቢይ፡ ወዕበይ፡ ተውህቦ፡ ሎቱ፡ በውስተ፡ ራእይ፡ ወውእተ፡ አሚረ፡ አነ፡ ዳንኤል፡ ሀሎኩ። እላሑ፡ ፫ሰንበታተ፡ መዋዕል። እክለ፡ ፍትወት፡ ኢበላዕኩ፡ ወኢቦአ፡

(col. 3) ውስተ፡ አፋየ፡ ሥጋ፡ ወወይን፡ ወቅብዓ፡ ኢተቀባዕኩ፡ እስከ፡ ተፈጸመ፡ ፫ሰንበታተ፡ መዋዕል፡ ወኮነ፡ እምድኅረ፡ ፲ወ፳ዓመት፡ በጽባሕ፡ ቼወረቡዑ፡ ለሠርቀ፡ ወርኅ፡ ቀዳሚ፡ ወሀሎኩ፡ አነ፡ ኀበ፡ ፈለግ፡ ዓቢይ፡ ዘውእቱ፡ ጤግሮስ፡ ወአንሣዕኩ፡ አዕይንትየ፡ ወነጸርኩ። ወናሁ፡ ብእሲ፡ ፩ዘይለብስ፡ ወብደነ፡ ወቅኑት፡ ሐቃሁ፡ በቅናተ፡ ወርቀ፡ አፈዝ፡ ወነፍስቱሂ፡ ከመ፡ ተርሴስ፡ ወገጽሂ፡ ከመ፡ ራእየ፡ መብረቅ። ወአዕይንቲሁ፡ ከመ፡ መሐትወ፡ እሳት፡ ወእደዊሁ፡ ወእገሪሁ፡ ከመ፡ ብርት፡ ርሱን፡ ወቃለ፡ ነገሩ፡ ከመ፡ ድምፀ፡ አሕዛብ፡ ብዙኅ። ወርኢኩ፡ አነ፡ ዳንኤል፡ ባሕቲትየ፡ ዘ፡ ራእየ፡ ወዕደው፡ እለ፡ ምስሌየ፡ ኢርእዩ፡ ዘራእየ፡ ዳዕሙ፡ ዓቢይ፡ ወረዓድ፡ ወድንጋ። አኅዞሙ። ወእምፍርሃት፡ ጐዩ፡ ወአነ፡ ባሕቲትየ፡ ተረፍኩ፡ ወርኢኩ፡ ዘ፡ ራዕየ፡ ዓቢየ። ወኢተርፈ፡ ላዕሌየ፡ ኃይልየ፡ ወክብርየኒ፡ ተወለጠ፡ ወበልየ፡ ላዕሌየ፡ ወኢአኅዝኩ፡ ኃይለ፡ ወሰማዕኩ፡ ቃለ፡ ነገሩ፡ ወሰሚዕየ፡ ቃለ፡ ነገሩ፡ ደንገፀኩ፡ ወወደቁ፡ በገጽየ፡ ውስተ፡ ምድር፡ ወናሁ፡ እድ፡ ለከፈኒ፡ ወአኅዝኒ፡ በእራኃ፡ እዴየ፡ ወዓቀመኒ፡ በብረኪየ። ወይቤለኒ፡ ዳንኤል፡ ዳንኤል፡ ብእሴ፡ ፍትወት፡ አንተ፡ ወለቡ፡ ዘነገረ፡ ዘእነግረከ፡ አነ። ወቁም፡ ዘእገረከ፡ እስመ፡ ይእዜ፡ ተፈነውኩ። ኀቤክ። ወሶበ፡ ይቤለኒ፡ ዘ፡ ነገረ፡ ተንሣእኩ፡ እንዘ፡ እርዕድ። ወይቤለኒ፡ ኢትፍራህ፡ ዳንኤል፡ እስመ፡ እምቀዳሚት፡ ዕለት፡ ዘአግባዕከ፡ ልበከ፡ ቅድመ፡ እግዚአብሔር፡ ከመ፡ ትሥራኅሂ፡ ወትለቡ፡ ለገጽ፡ አምላክከ፡ ተሰምዓ፡ ነገርከ፡ ወአነ፡ መ

F. 170v

(col. 1) እኩ፡ በእንተ፡ ቃልከ፡ ወመልአከ፡ ንጉሠ፡ ፋርስ፡ ይቀውም፡ ቅድሜየ፡ ቼወአሐተ፡ ዕለተ። ወናሁ፡ ሚካኤል፡ ፩እመላእክት፡ ቀደምት፡ መጽአ፡ ይርድአኒ፡ ወኪያሁ፡ ኃይተ፡ ህየ፡ ምስለ፡ መልአከ፡ ንጉሠ፡ ፋርስ። ወይቤለኒ፡ መጻእኩ፡ እንግርከ፡ ዘይረከቦሙ፡ ለሕዝብከ፡ በደኃሪ፡ መዋዕል። እስመ፡ ራእይ፡ ዓዲ፡ በዕድሜሁ፡ አቤ፡ እንግርከ። ወሶበ፡ ነገረኒ፡ ዘ፡ ነገረ፡ ሜጥኩ፡ ገጽየ፡ ወስተ፡ ምድር፡ ደንገፀኩ፡ ወብሕምኩ፡ ወናሁ፡ ከመ፡ አምሳለ፡ ወልደ፡ ዕኃለ፡ እመሕያው፡ ሰሶኒ፡ ከናፍርየ፡ ወከሠትኩ፡ አፋየ፡ ወነበብኩ። ወእቤሎ፡ ለዘይቀውም፡ ቅድሜየ፡ እግዚእየ፡ እምግርማ፡ ራእይከ፡ ተገፍትዓት፡ ወተመስወት፡ ነፍስየ፡ በላዕሌየ፡ ወኃግእኩ፡ ኃይለ፡ ወእፎ፡ ይክል፡ ገብርከ፡ ተናግሮ፡ ምስለ፡ እግዚአየ፡ ዘንተ። ወአነሂ፡ እምይእዜ፡ ኢይቀውም፡ ኃይልየ፡ ወኢይተርፍ፡ እምነ፡ መንፈስየ። ወዳግመ፡ ገሰሰኒ፡ ከመ፡ ራእየ፡ ብእሲ፡ ወአጽንዓኒ፡ ወይቤለኒ፡ ኢትፍራህ፡ ብእሴ፡ ፍትወት፡ አንተ፡ ሰላም፡ ለከ፡ ጽናዕ፡ ወኃይል፡ ወተዓገሥ፡ ወእንዘ፡ ይትናገረኒ፡ ጸናዕኩ፡ ወእቤሎ፡ ንግረኒ፡ እግዚእየ፡ እስመ፡ አጽናዕከኒ፡ ወይቤለኒ፡ ሶበ፡ ተአምር፡ ለምንት፡ መጻእኩ፡ ኀቤክ። ወይእዜኒ፡ እትመየጥ፡ ከመ፡ እጽብአ፡ ለመልአከ፡ ንጉሠ፡ ፋርስ፡ እንዘ፡ እወጽእ፡ አነ። ናሁ፡ መጽአ፡ መልአከ፡ አረማውያን። ወዳዕሙ፡ እነግረከ፡ ትእዛዘ፡ ዘተአዘዘ፡ በመጽሐፈ፡ ጽድቅ፡ ወአልቦ፡ መኑሂ፡ ዘያጸንዕ፡ ምስሌየ፡ ላዕለ፡ እሉ፡ ዳዕሙ፡ ሚካኤል፡ መልአክክሙ። ራእይ፡ ፲፱ራእይ፡ ፲፡ ወኮነ፡ በሣልስ፡ ዓመተ፡ መንግሥቱ፡ ለቂሮስ፡ ወቆምኩ፡ ለአህይሎቱ፡ ወ

(col. 2) ለረዲአቱ፡ በኃይል፡ ወበፅንዕ። ወይእዜኒ፡ ጽድቀ፡ ወፍትሐ፡ እነግረከ፡ እንከ። ወናሁ፡ ፫ነገሥት፡ ይትነሥኡ፡ ውስተ፡ ፋርስ፡ ራብዖሙ፡ ይብዕል፡ ብዕለ፡ ዓቢየ፡ እምኸሎሙ። ወእምድኅረ፡ አኅዘ፡ ወአስተብፀዖተ፡ ብዕሉ፡ ይትቃወሙ፡ ለኸሎሙ፡ ነገሥት፡ አረማውያን። ወይትነሣእ፡ ንጉሥ፡ ኃይል፡

ወይኳንን፡ መኸናን፡ ብዙኃ፡ ወይገብር፡ ዘፈቀደ፡ ወሰብ፡ ተንሥኡ፡ መንግሥቱ፡ ትትቀጠቀጥ፡ ወትዘረው፡
 ውስተ፡ ፬ነፋሳተ፡ ሰማይ፡ ወኢውስተ፡ ደኃሪቱ፡ ወኢበከመ፡ ምክናን፡ ዘከነን፡ እስመ፡ ትትመላህ፡
 መንግሥቱ፡ ወለባዕዳን፡ እምእሉ፡ ትተወሀብ፡ ወይጸንዕ፡ ንጉሠ፡ አዜብ፡ ወፈእመላእክቲሆሙ፡ ይጸንዕ፡
 ላዕሌሆሙ፡ ወይኳንን፡ ምክናን፡ ብዙኃ፡ ወእምድኅረ፡ ዓመታቲሁ፡ ይደመሩ፡ ወወለተ፡ ንጉሠ፡ አዜብ፡
 ትበውዕ፡ ኅበ፡ ንጉሠ፡ መስዕ፡ ከመ፡ ትግበር፡ ቀተተ፡ ምስሌሁ፡ ወይጸንዕ፡ ኃይለ፡ መዝራዕቱ፡
 ወይቀውም፡ ዘርኡ፡ ወይትወሀብ፡ ላቲ፡ ወእለሂ፡ አምጽእዋ፡ ለወለት፤ ወዘያጸንዕዎሙሂ፡ በመዋዕሊሆሙ፡
 ወይቀውም፡ እምጉንደ፡ ሥርዋ፡ ጽኑዕ፡ ወይመጽእ፡ በኃይል፡ ወይበውዕ፡ በኃይል፡ ንጉሠ፡ መስዕ፡
 ወይገብር፡ ቦሙ፡ ወያጸንዖሙ፡ ወይገፈትዖሙ፡ ለመላእክቲሆሙ፡ ምስለ፡ አማልክቲሆሙ፡ ወምስለ፡
 መኳንንቲሆሙ፡ ወምስለ፡ ክሉ፡ ንዋየ፡ መፍትው፡ ወወርቆሙ፡ ወብሩሮሙ፡ ምስለ፡ ፂዋ፡ ይወስድ፡
 ግብጽ፡ ወውእቱ፡ ይቀውም፡ ዳግመ፡ በእንተ፡ ቀትለ፡ ንጉሠ፡ መስዕ፡ ወያቀውም፡ ብዙኃ፡ አሕዛብ፡
 ወይበውዕ፡ ውስተ፡ መንግሥቱ፡ ለንጉሠ፡ አዜብ፡ ወይሠወጥ፡ ብሔሮ፡ ወደቂቁ፡ ይፃብኡ፡ ወያስተጋብኡ፡
 አሕዛብ፡ ሠራዊተ፡ ወይመጽእ፡ ወይትቃተል፡ የምስለ፡ ንጉሠ፡

(col. 3) መስዕ፡ ወያቀውም፡ ብዙኃ፡ አሕዛብ፡ ወይትዓረወይ፡ ንጉሠ፡ አዜብ፡ ወይወፅእ፡ ወይትቃተል፡
 ምስለ፡ ንጉሠ፡ መስዕ፡ ወያቀውም፡ ብዙኃ፡ አሕዛብ፡ ወይገብኡ፡ ውስተ፡ እዴሁ፡ ሰብኡ፡ ወይነሥእ፡
 አሕዛቢሁ፡ ወየዓቢ፡ ልቦ፡ ወይቀትል፡ አዕላፈ፡ ይጸንዕ፡ ወይሠወጥ፡ ንጉሠ፡ መስዕ፡ ካዕበ፡ ወያመጽእ፡
 ብዙኃ፡ ሠራዊተ፡ እምዘ፡ ቀዲሙ፡ ወእምድኅረ፡ ብዙኅ፡ መዋዕል፡ ይመጽእ፡ መጺኡ፡ በኃይል፡ ዓቢይ፡
 ወበንዋይ፡ ብዙኅ፡ ወበእማንቱ፡ መዋዕል፡ ብዙኃን፡ ይትነሥኡ፡ ላዕለ፡ ንጉሠ፡ አዜብ፡ ወደቂቁ፡ ዓመ፡
 ሕዝብከ፡ ይትነሥኡ፡ ለዓቅ[መ]፡ ራእይ፡ ወይደክሙ፡ ወይመጽእ፡ ንጉሠ፡ መስዕ፡ ወይክዑ፡ ኃይለ፡
 ወይእኅዙ፡ ሀገረ፡ ፀወናተ፡ ወመዝራዕታተ፡ አዜብ፡ ኢይቀውም፡ ወሕዝብ፡ እምኅሩያኒሁ፡ ወአልቦሙ፡
 ኃይል፡ ለቀዊም፡ ወይገብር፡ ዘመጽኡ፡ ኅቤሁ፡ ወይቀውም፡ በምድር፡ ሠናያት፡ ወይፌጽም፡ በእዴሁ፡
 ወይፊሊ፡ ገጽ፡ ለመጺእ፡ ውስተ፡ ኃይለ፡ ክሉ፡ መንግሥቱ፡ ወመላእክት፡ ምስሌሁ፡ ወይገብር፡ ወወለተ፤
 አንስትያ፡ ትትወሀብ፡ ሎቱ፡ ለጠፊኦቱ፡ ወኢትነብር፡ ወኢትከውኖ፡ ራእይ፡ ወይመይጥ፡ ገጽ፡ ውስተ፡
 ደሰያት፡ ወይእኅዝ፡ ብዙኃን፡ ወይሥዕር፡ መኳንንተ፡ ኃፍረቱ፡ ሎቱ፡ ዘእንበለ፡ ኃፍረቱ፡ ይትመየጥ፡ ሎቱ፡
 ወይመይጥ፡ ገጽ፡ ለአጽንዖተ፡ ምክሩ፡ ወይደክም፡ ወይወድቅ፡ ወኢይትረከብ፡ ይትነሣእ፡ ወይነብር፡
 በመንበሩ፡ ወይሥዕር፡ ሥልጣን፡ ወሠናየ፡ መንግሥታተ፡ ወእምድኅረ፡ መዋዕል፡ ይሰበር፡ አኮ፡ በመፃት፡
 ወአኮ፡ በፀብዕ፡ ወይቀውም፡ ዲበ፡ መንበሩ፡ ኅሡር፡ ወኢይሁብዎ፡ ክብረ፡ መንግሥት፡ ወይመጽእ፡
 በኅድኡት፡ ወይ

F. 171r

(col. 1) ጸንዕ፡ በመንግሥቱ፡ በሁከት፡ ወእምቅድሜሁ፡ ይትቀጠቀጥ፡ መጋብያን፡ ሕግሂ፡ ወእምእለ፡
 ይሳተፍዎ፡ ይገብሩ፡ ላዕሌሁ፡ ጽልሑተ፡ ወየዓርግ፡ ወይጸንዕ፡ በሕዝብ፡ ንዑስ፡ ወብሔር፡ ጥሉል፡
 ይመጽእ፡ ወይገብር፡ ዘኢገብሩ፡ አበዊሁ፡ ወይመሀርክ፡ ወይጸውው፡ ወይነድዕ፡ እንስሳሆሙ፡ [ወ]ላዕለ፡
 ፀወናቲሆሙ፡ ይሔሊ፡ ሕሊናሁ፡ እስከ፡ ጊዜሁ፡ ወይነሥእ፡ ኃይሎ፡ ወልቡ፡ ላዕለ፡ ንጉሠ፡ አዜብ፡
 በሠራዊት፡ ዓቢይ፡ ወንጉሠ፡ አዜብ፡ ይጸንዕ፡ ለተጻብኡ፡ በሠራዊት፡ ዓቢይ፡ ወጽኑዕ፡ ጥቀ፡ ወኢይጸንዕ፡
 እስመ፡ ይሔልዩ፡ ሕሊና፡ ወእለ፡ ይበልዑ፡ ውስተ፡ ማዕዱ፡ ይቀጠቅጥዎ፡ ኃይሎ፡ ወይወድቁ፡ ቅቱላን፡
 ብዙኃን፡ ወክልሜሆሙ፡ ነገሥት፡ የአክዩ፡ ልቦሙ፡ ወበአሐቲ፡ ማዕድ፡ ይትናገሩ፡ ሐሰተ፡ ወኢያረትዑ፡
 እስመ፡ ዓዲ፡ ኢበጽሐ፡ ዕድሜሁ፡ ወየእቱ፡ ብሔሮ፡ ምስለ፡ ብዙኅ፡ ንዋይ፡ ወልቡስ፡ ላዕለ፡ ሥርዓት፡
 ቅድስት፡ ወይገብር፡ ወይተመየጥ፡ ኅበ፡ ምድሩ፡ በዕድሜ፡ ይትመየጥ፡ ወይመጽእ፡ ውስተ፡ አዜብ፡
 ወኢይከውኖ፡ በቀዳሚሁ፡ ወበደኃሪቱ፡ ወይመጽኡ፡ ኅቤሁ፡ ጺም፡ ወከይቲም፡ ወኒባእ፡ ወይትመየጥ፡
 ወይትመዓዕ፡ ላዕለ፡ ሥርዓት፡ ቅድስት፡ ወይገብር፡ ወይትመየጥ፡ ያረኩሱ፡ መቅደስ፡ ወይበረብሩ፡

ወያነብሩ፡ ጣዖተ፡ ዲበ፡ እለ፡ የኃድጉ፡ ሥርዓተ፡ ቅዱስ፡ ወዘርአሙ፡ እምኔሁ፡ ይትነሥኡ፡ ወያረኸሱ፡ መቅደስ፡ ወእለ፡ ይዔም፡ ሥርዓተ፡ ያመጽኡ፡ ዳኅ፡ ወሕዝብ፡ ዘየአምር፡ አምልኮ፡ ይጸንዑ፡ ወይገብሩ፡ ወጠቢባነ፡ ሕዝብ፡ ይሉብው፡ ብዙኃ፡ ወይደክሙ፡ በኩናት፡ ወበእሳት፡ ወበተዓውዎ፡ ወይትበረበሩ፡ ብዙኃ፡ መዋዕለ፡ ወደዊሮሙ፡ ይረድእዎሙ፡ ረድኤተ፡ ኅዳጠ፡ ወይትዌስኩ፡ ላዕ

(col. 2) ሌሆሙ፡ ብዙኃን፡ በዳኅዓቲሆሙ፡ ወይደውዩ፡ እምጠቢባን፡ ከመ፡ ያርስንዎሙ፡ ወያጽርይዎሙ፡ ያንጽሕዎሙ፡ እስከ፡ ጊዜ፡ እስመ፡ ዓዲ፡ ዕድሜ፡ ከመ፡ ይትከሠት፡ በዕድሜሁ፡ ዘይቀውም፡ ውስተ፡ መካን፡ ቅዱስ፡ ወያነብብ፡ ለይለዑ፡ መጽሐፈ፡ ዳንኤል፡ ወይገብር፡ ንጉሥ፡ በከመ፡ ፈቀደ፡ ወይትዔበይ፡ ወይዜሃር፡ ላዕለ፡ ኩሉ፡ አምላክ፡ ወላዕለ፡ አምላክ፡ አማልክት፡ ይነብብ፡ በትዕቢት፡ ወይረትዕ፡ እስከ፡ የኃልቅ፡ መዓት፡ እስከ፡ ምንዳቤ፡ ተገብረት፡ ወላዕለ፡ አምላክ፡ አበዊሁ፡ ኢየአምር፡ ወበፍትወተ፡ አንስት፡ ወላዕለ፡ ኩሉ፡ አምላክ፡ ኢየአምር፡ እስመ፡ ላዕለ፡ ኩሉ፡ ይትዔበይ፡ ወለእግዚአብሔር፡ ዘኢየአምርዎ፡ አበዊሁ፡ ያከብር፡ በወርቅ፡ ወበብሩር፡ ወበዕንቅ፡ ሠናይ፡ ወበፍትወት፡ ወይገብር፡ ለአህጉር፡ ጽኑዓት፡ ምስለ፡ አምላክ፡ ነኪር፡ ዘየአምር፡ ክብረ፡ ወስብሐተ፡ ላዕለ፡ ብዙኃን፡ ወይከፍል፡ ምድረ፡ በሜጥ፡ ወበጊዜ፡ ዕድሜ፡ ይጸብክ፡ ንጉሠ፡ አዜብ፡ ወይትሀወክ፡ ላዕሌሁ፡ ንጉሠ፡ መስዕ፡ በሠረገላት፡ ወበአፍራስ፡ ወበአሕማር፡ ብዙኃት፡ ወይበውዕ፡ ወይመጽእ፡ ውስተ፡ ምድር፡ ሠናይት፡ ውብዙኃን፡ ይደክሙ፡ ወእሙንቱ፡ ወይድኅኑ፡ እምእዴሁ፡ ኤዶም፡ ወሞአብ፡ ወሕዝበ፡ አሞን፡ ወይፌኑ፡ እዴሁ፡ ውስተ፡ አምዳር፡ ወምድረ፡ ግብጽ፡ ኢትድኅን፡ እምእዴሁ፡ ወይሠለጥ፡ ላዕለ፡ መዛግብት፡ ዘወርቅ፡ ወዘብሩር፡ ወላዕለ፡ ኩሉ፡ ፍትወት፡ ግብጽ፡ ወኖባ፡ ወኢትዮጵያ፡ ይከውንዎ፡ ረዳዕያነ፡ ሎቱ፡ ወዜና፡ ወይበጽሐ፡ ወይጐጉዕ፡ እምሥራቅ፡ ወእምሰሜን፡ ይወፅእ፡ በመዓት፡ ዓቢይ፡ ወይቀትል፡ ወያጠፍዕ፡ ብዙኃን፡ ወይተክል፡ ደብተራሁ፡

(col. 3) ውስተ፡ መካን፡ ሠናይ፡ ማዕከለ፡ ባሕር፡ ወደብር፡ ወመቅደስ፡ ወይጸንዕ፡ እስከ፡ ጊዜሁ፡ ወአልቦ፡ ረዳኢ፡ ሎቱ፡ ራእይ፡ ወውእተ፡ አሚረ፡ ይትነሣእ፡ ሚካኤል፡ መልአክ፡ ዓቢይ፡ ዘይቀውም፡ ለደቂቀ፡ ሕዝብክ፡ ወይከውን፡ ጊዜ፡ ሕማም፡ እምኔሁ፡ ወምንዳቤ፡ ዘኢኮነ፡ ከማሁ፡ እምአመ፡ ተፈጥሩ፡ አሕዛብ፡ ዲበ፡ ምድር፡ እስከ፡ ውእቱ፡ ጊዜ፡ ወበውእቱ፡ መዋዕል፡ ይድኅኑ፡ ሕዝብክ፡ ኩሉ፡ ዘተረክበ፡ ውስተ፡ መጽሐፍ፡ ውብዙኃን፡ እለ፡ ይነውሙ፡ ውስተ፡ መሬተ፡ ምድር፡ ይትነሥኡ፡ እሉ፡ ለሕይወት፡ ዘለዓለም፡ ወእልክቱስ፡ ለኃሣር፡ ዘለዓለም፡ ወእለ፡ ለበዉ፡ ይበርሑ፡ ከመ፡ ብርሃነ፡ ሰማይ፡ ወእምነ፡ ጻድቃን፡ ብዙኃን፡ ከመ፡ ከዋክብተ፡ ሰማይ፡ እስከ፡ ለዓለም፡ ወዓዲ፡ ወአንተሂ፡ ዳንኤል፡ ዕዕዎ፡ ለዝ፡ ነገር፡ ወሕትሞ፡ ለዝ፡ መጽሐፍ፡ እስከ፡ ማኅለቅት፡ ይትመሐሩ፡ ብዙኃን፡ ወትባዝህ፡ ጥበብ፡ ወነጸርኩ፡ አነ፡ ዳንኤል፡ ወርኢኩ፡ ካልአነ፡ አሐዱ፡ እምለፌ፡ ድንጋገ፡ ፈለግ፡ ይቀውም፡ ወአሐዱ፡ እምከሀ፡ ፈለግ፡ ወይቤሎ፡ ለብእሲ፡ ዘይለብስ፡ ጠብደነ፡ ዘሀሎ፡ መልዕልተ፡ ማየ፡ ፈለግ፡ እስከ፡ ማዕከኑ፡ ለዘትቤ፡ ትእምርት፡ ወሰማዕክዎ፡ ለብእሲ፡ ዘይለብስ፡ ጠብደነ፡ ዘሀሎ፡ ዲበ፡ ማየ፡ ፈለግ፡ ወአልዓለ፡ የማኖ፡ ወጸጋሞ፡ ውስተ፡ ሰማይ፡ ወመሐለ፡ በዘሕያው፡ ለዓለመ፡ ዓለም፡ እስከ፡ ለጊዜ፡ ወጊዜያት፡ ወመንፈቅ፡ ሶበ፡ ተፈጸመ፡ ዝርወተ፡ ሕዝብ፡ ቅዱስ፡ ይትፌጸም፡ ዝንቱ፡ ኩሉ፡ አነሂ፡ ሰማዕኩ፡ ወኢጠየቁ፡ ወእቤ፡ እግዚአ፡ ምንት፡ ደኃራቱ፡ ለዝንቱ፡ ወይቤለኒ፡ ሑር፡ ዳንኤል፡ እስመ፡ ዕዕው፡ ወኅቱም፡ ነገሩ፡ እስከ፡ ማኅለቅተ፡ ዕድሜሁ፡ ይጸርዩ፡ ወይፀዓድዉ፡ ያቤይንዎሙ፡ ወያረስን

F. 171v

(col. 1) ዎሙ፡ ወይትቁደሱ፡ ብዙኃን፡ ወይስሕቱ፡ ጊጉያን፡ ወኢይሌብው፡ ሰማዕያን፡ ወይጤይቁ፡ ጠቢባን፡ በዕድሜሁ፡ ሣህሎ፡ እምነ፡ ዘወሀብክዎ፡ ከመ፡ ይትወሀብ፡ እምነ፡ ርኽሶሙ፡ ወዘይማስኑ፡ ወእምጊዜ፡ ዘይሠዓር፡ መሥዋዕት፡ ለብውሂ፡ ርኽሱ፡ እምውሱን፡ መዋዕለ፡ ፲ተ፡ ወ፪ተ፡ ፻ተ፡ ፺ተ፡ ብፁዕ፡ ዘተዓገሠ፡ ወበጽሐ፡ ፲ተ፡ ወ፫ተ፡ ፻ወ፴ወሐሙስ፡ መዋዕለ፡ ወአንተስ፡ ነዓ፡ አዕርፍ፡ እስመ፡ ዓዲ፡

መዋዕል፡ ወሰንበታት፡ በዘይትፌጸም፡ ማኅለቅቱ፡ ወተዓርፍ፡ ወትትነሣእ፡ ውስተ፡ ርስትክ፡ በደኃሪ፡ መዋዕል፡ እምድሃረ፡ ሞተ፡ ንጉሥ፡ አስጥያሊስ፡ ወተቀብረ፡ ኅበ፡ አበዊሁ፡ ነሥአ፡ ቂርሶ፡ ፋርሳዊ፡ መንግሥቶቹ፡ ወሀሎ፡ ዳንኤል፡ ደቀ፡ ጽርሑ፡ ለንጉሥ፡ ወይከብር፡ እምኩሉ፡ አዕርክቲሁ፡ ወሀሎ፡ ምስል፡ ዘያመልኩ፡ ሰብአ፡ ባቢሎ፡ ን፡ ወያስተዋፅኡ፡ ሎቱ፡ ኩሎ፡ አሚረ፡ ሲሳዮ፡ ሰንዳሌ፡ እስር፡ ወካዕበ፡ በመስፈርተ፡ አርጣባስ፡ ወአባጣ፡ ጃወወይነ፡ ጌመሳፍረ፡ ወያመልኩ፡ ንጉሥ፡ ወየሐውር፡ ንጉሥ፡ ኩሎ፡ አሚረ፡ ወይሰግድ፡ ሎቱ፡ ወዳንኤልስ፡ ይሰግድ፡ ለአምላክ፡ ወይቤሎ፡ ንጉሥ፡ ለምንት፡ ኢትሰግድ፡ ለቤል፡ ወይቤ፡ ኢያመልክ፡ ጣዖተ፡ ግብረ፡ እደ፡ ሰብእ፡ ዘእንበለ፡ ዳዕሙ፡ ለአምላክ፡ ሕያው፡ ዘፈጠረ፡ ሰማየ፡ ወምድረ፡ ወመኩንን፡ ውእቱ፡ ለኩሎ፡ ዘነፍስ፡ ወይቤሎ፡ ንጉሥ፡ ይመስለኩ፡ ኢኮነ፡ ሕያው፡ አምላክ፡ ቤል፡ ወኢትፊኢት፡ መጠነ፡ ይበልዕ፡ ወይሰቲ፡ እንተ፡ ጸብሐት፡ ወሰሐቀ፡ ዳንኤል፡ ወይቤ፡ ኢያስሕቱክ፡ ንጉሥ፡ ዝሰ፡ ውስጡ፡ ዕዑር፡ ወአፍአሁ፡ ብርት፡ ኢይበልዕ፡ ግሙራ፡ ወተምዓ፡ ንጉሥ፡ ወጸውያሙ፡ ለገነውቱ፡ ወይቤሎሙ፡ እመ፡ ኢነገርክ

(col. 2) ሙኒ፡ መኑ፡ ይበልዕ፡ ዘንተ፡ ሲሳዮ፡ ትመውቱ፡ ወእመስ፡ አብጻሕክሙ፡ ሊተ፡ ከመ፡ ቤል፡ ይበልዕ፡ ዳንኤል፡ ይመውት፡ ዘጸረፈ፡ ላዕለ፡ ቤል፡ ወይቤሎ፡ ለንጉሥ፡ ይኩን፡ በከመ፡ ትቤ፡ ወየአክሉ፡ ገነውቱ፡ ለቤል፡ ሰብአ፡ ዘእንበለ፡ አንስት፡ ወደቅ፡ ወሐሩ፡ ንጉሥ፡ ወዳንኤል፡ ቤተ፡ ቤል፡ ወይቤሎ፡ ገነውተ፡ ቤል፡ ናሁ፡ ንሕነ፡ ነሐውር፡ አፍአ፡ ወአንተ፡ ንጉሥ፡ ሥራዕ፡ ማዕዳቲሁ፡ ወቅዳሳ፡ ወይኖሂ፡ ወአስተናብር፡ ወዝጋሕ፡ ኖሳቶሂ፡ ወኅትም፡ በማኅተምክ፡ ወጊስ፡ በጽባሕ፡ ወእመ፡ ኢረክብክ፡ በዘኢበልዓ፡ ንመውት፡ ወእመ፡ አኮ፡ ዳንኤል፡ ዘሐሰወ፡ ላዕሌነ፡ ወእመንቱስ፡ የአምሩ፡ ዘይገብሩ፡ በታሕተ፡ ማዕድ፡ በሙ፡ ፍኖት፡ ኅቡዕ፡ ወእንተ፡ ህየ፡ ይበውኡ፡ ዘልፈ፡ ወይበውኡ፡ ወወሂአሙ፡ ሠርዓ፡ ንጉሥ፡ ለቤል፡ ዘይበልዕ፡ ወአዘዘ፡ ዳንኤል፡ ለቅዱሳሁ፡ ያምጽእ፡ ሐመደ፡ ወነስነሰ፡ ውስተ፡ ቤቱ፡ በቅድመ፡ ንጉሥ፡ ባሕቲቱ፡ ወወሂአሙ፡ ዓፀወ፡ ኖሳተ፡ ወሐተመ፡ በማኅተመ፡ ንጉሥ፡ ወኃሊፎሙ፡ ቦሉ፡ ገነውተ፡ ቤል፡ በሌሊት፡ በከመ፡ ያለምዱ፡ ወአንስቶሙ፡ ወደቂቆሙ፡ በልዑ፡ ወሰትዩ፡ ኩሎ፡ ወጌሡ፡ በጽባሕ፡ ንጉሥ፡ ወዳንኤል፡ ወይቤ፡ ንጉሥ፡ ዳኅንኑ፡ ማሕተምክ፡ ዳንኤል፡ ወይቤ፡ እወ፡ ንጉሥ፡ ወእምዝ፡ ሶበ፡ አርኃወ፡ ኖሳተ፡ ነጸረ፡ ንጉሥ፡ ዘወድዑ፡ ማዕደ፡ ወውዓ፡ በዓቢይ፡ ቃል፡ አንተ፡ ቤል፡ አልብክ፡ ትምይንት፡ ወስሐቀ፡ ዳንኤል፡ ወአኅዞ፡ ለንጉሥ፡ ኢይባእ፡ ውሥጠ፡ ወይቤሎ፡ ነጽር፡ ምድረ፡ ወርኢ፡ አሠረ፡ ምንትዝ፡ ወይቤ፡ ንጉሥ፡ እፊኢ፡ አሠረ፡ ዕደው፡ ወአንስት፡ ወደቅ፡ ወተምዓ፡ ንጉሥ፡ ወአኅዞሙ፡ ሶቤሃ፡ ለገነውት፡ ወአንስቶሙ፡ ወደቆሙ፡ ወአርአይዎ፡ ኖሳተ፡ ኅቡአ፡ እንተ፡ ኅበ፡ ይበውኡ፡ ወይበልዑ፡ ዘውስተ፡ ማዕድ፡ ወቀተሎሙ፡ ንጉሥ፡ ወወሀበ፡ ቤልሃ፡

(col. 3) ወመጠዎ፡ ለዳንኤል፡ ወቀጥቀጦ፡ ወነስተ፡ ቤቶ፡ ወሀሎ፡ ከይሲ፡ ዓቢይ፡ ወያመልክዎ፡ ሰብአ፡ ባቢሎን፡ ወይቤሎ፡ ንጉሥ፡ ለዳንኤል፡ ዝኒ፡ ብርትኑ፡ ትብል፡ ወናሁ፡ ሕያው፡ ይበልዕ፡ ወይሰቲ፡ ወኢትክል፡ አብሶቶ፡ ኢኮነ፡ ሕያው፡ አምላክ፡ ሰግድ፡ ሎቱ፡ ይቤ፡ ዳንኤል፡ ለእግዚአብሔር፡ አምላኪየ፡ እስግድ፡ እስመ፡ ውእቱ፡ አምላክ፡ ሕያው፡ ወአንተ፡ ንጉሥ፡ አብሐኒ፡ እቅትሎ፡ ለዝ፡ ከይሲ፡ ዘእንበለ፡ መጥባሕት፡ ወበትር፡ ወይቤሎ፡ ንጉሥ፡ አባሕኩክ፡ ወነሥአ፡ ዳንኤል፡ ፒሳ፡ ወሥዕርተ፡ ወስብሐ፡ ወአብሰሎ፡ ኅቡረ፡ ወገብሮ፡ ልሕሉሐ፡ ወአፍአሞ፡ ለከይሲ፡ ውስተ፡ አፉሁ፡ ወውኒጠ፡ ነቅዓ፡ ውእቱ፡ ከይሲ፡ ወይቤሎሙ፡ ርእዩ፡ አምላክክሙ፡ ወእምዝ፡ ሰሚያሙ፡ ሰብአ፡ ባቢሎን፡ ተምዕዑ፡ ጥቀ፡ ወተመይጡ፡ ላዕለ፡ ንጉሥ፡ ተሐይደ፡ ንጉሥ፡ ቤልሃ፡ ቀተለ፡ ወቀጥቀጠ፡ ወከይሲኒ፡ ቀተለ፡ ወገነውተኒ፡ ቀተለ፡ ወይቤሎ፡ ንሑር፡ ኅበ፡ ንጉሥ፡ ወየሀበነ፡ ዳንኤልሃ፡ ወእመ፡ አኮ፡ ንቀትለክ፡ ወቤተከሂ፡ ናውዒ፡ በእሳት፡ ከመ፡ ጥቀ፡ ያጠውቅዎ፡ ሶበ፡ በግብር፡ ኮኖ፡ ለንጉሥ፡ መጠዎሙ፡ ዳንኤልሃ፡ ወወሰድዎ፡ ውስተ፡ ግበ፡ አናብስት፡ ወነበረ፡ ጌተ፡ ዕለተ፡ ወሀለዉ፡ ውስተ፡ ግብ፡ አናብስት፡ ወኩሎ፡ አሚረ፡ ይሴስይዎሙ፡ ጄስብአ፡ ወጄአባጣ፡ ወአሚሁስ፡ ኢወሀብዎሙ፡ ከመ፡ ይብልዕዎ፡ ለዳንኤል፡ ወሀሎ፡ ዕንባቆም፡ በይሁዳ፡ ነቢይ፡ ወአብሰለ፡ ተብሲለ፡ ወኅብስተኒ፡ ወወደየ፡ ውስተ፡ አስፈሪድ፡ ወወረደ፡ ሐቅለ፡ ይሰድ፡ ለእለ፡

የዓዕዱ፡ ወይቤሎ፡ መልአክ፡ እግዚአብሔር፡ ለዕንባቆም፡ ስድ፡ ዘንተ፡ ምሳሐ፡ ለዳንኤል፡ ውስተ፡
 ባቢሎን፡ ኀበ፡ ግበ፡ አናብስት፡ ወይቤሎ፡ ዕንባቆም፡ ኢያአምር፡ ባቢሎን፡ ወኢርኢኩ፡ ግበ፡ አናብስት፡
 አይቴ፡ ውእቱ፡ ወአኀዘ፡ መልአክ፡ በድማሁ፡ ወጸሮ፡ በሥዕርተ፡ ርእሱ፡ ወ

F. 172r

(col. 1) አብጽሖ፡ ውስተ፡ ግበ፡ አናብስት፡ ዘባቢሎን፡ በኃይለ፡ መንፈሱ፡ ወከልሖ፡ ዕንባቆም፡ ወይቤ፡
 ዳንኤል፡ ዳንኤል፡ ንግእ፡ ምሳሐ፡ ዘፈነወ፡ ለከ፡ እግዚአብሔር፡ ወይቤ፡ ዳንኤል፡ ተዘከረኒሁ፡
 እግዚአብሔር፡ ወኢኀደኀሙ፡ ለእለ፡ ያፈቅርዎ፡ ወተንሥኦ፡ ዳንኤል፡ ወበልዓ፡ ወአግብኦ፡ መልአክ፡
 እግዚአብሔር፡ ለዕንባቆም፡ ብሔሮ፡ ሶቤሃ፡ ወመጽኦ፡ ንጉሥ፡ በሳብዕት፡ ዕለት፡ ወለሀዎ፡ ለዳንኤል፡
 ወቀርበ፡ ኀበ፡ ግበ፡ አናብስት፡ ወነጸረ፡ ወርእዮ፡ ለዳንኤል፡ ይነብር፡ ወከልሖ፡ ንጉሥ፡ በዓቢይ፡ ቃል፡
 ወይቤ፡ ዓቢይ፡ አንተ፡ እግዚአብሔር፡ አምላክ፡ ዳንኤል፡ ወአልቦ፡ ባዕድ፡ ዘእንበሌከ፡ ወአውፅኦ፡
 ወለእልክቱሰ፡ እለ፡ ፈቀዱ፡ ይቅትልዎ፡ አውረድዎሙ፡ ውስተ፡ ግብ፡ ወበልዕዎሙ፡ ሶቤሃ፡ በቅድሜሁ፡